

سيناريو فيلم

زهرة

(وهبتها الحياة عميرين .. للعرض فقط)

تأليف

رينا مصطفى

اسم الكتاب: زهرة

اسم الكاتب: دينا مصطفى

تصميم الغلاف: عبدالله عباس

رقم الإيداع:

الترقيم الدولي:

كافة الحقوق محفوظة للناشر والمؤلف

لا يُسمح بإعادة طبع أو توزيع أي جزء بأي طريقة، بما يشمل ذلك التصوير أو الطباعة أو التسجيل الصوتي أو أي وسيلة أخرى إلكترونية أو غير إلكترونية، دون إذن كتابي مسبق من الناشر، ويسمح فقط في حال الاستعانة ببعض الفقرات لغرض النقد والدراسة، طبقاً لما تحدده قوانين واتفاقيات حقوق الملكية الفكرية.

سيناريو فيلم

زهرة

(وهبتها الحياة عمريين .. للعرض فقط)



مؤسسة
الكاتب
الحريري
The Writer Operation

إهداء

للزهرة .. شريهان ♥

.. شفقتك زهرة من أول لحظة ..

١ - محطة قطار اسوان / نهار داخلي

- يقف بدر (ثلاثيني اسمر) في انتظار احدهم بينما ينظر في ساعته من وقت لآخر ..
- لحظات ويتصل من هاتفه .. لحظات اخرى ويظهر من داخل المحطة امامه متوجه اليه عمر (بطلنا/ ثلاثيني بلحيه مشعته نوعا مرتديا بدلة تنقصها ربطة العنق وجاكتتها على ذراعه وحقيبة اوراق باليد الاخرى وعلى كتفه حقيبة)
- يسلمان على بعض في عجله بينما يسيران باتجاه باب الخروج ..

بدر : .. ايه ياعم حمدالله ع السلامة ..

عمر : .. الله يسلمك .. اتأخرنا ..؟

بدر : .. ان شاء الله لأ .. وايه دقنك دي ..؟ .. مش كنت سمعت كلامي وجيت من امبارح حتى كنت لحقت تحلقها ..

عمر : .. احلق ايه ده الشغل كله فيها ..

- قطع

٢ - قاعة محكمة / نهار داخلي

- عمر وبدر على المقعد الامامي يتحدث بدر مع شاب بجواره بينما عمر يتابع رجالان في الستين على مقعد الخصوم بجانبهم محامي في الخمسين والجميع ملتحي بينما يتناوبون النظر باتجاهه متفحصين .. وعلى غفلة يخرج لهم عمر لسانه كالاطفال ليتفاجأوا ..
- لحظات ونرى سجده (عشر ينيه سمراء) تسرع باتجاههم تجلس خلف بدر ..

بدر : .. اتأخرتي ليه انتي كمان ؟..

سجده : (متسارعة الانفاس) البنك كان زحمه عشان المعاشات .. (ولعمر) حمدالله ع السلامة يا متر..

- لحظة دخول القاضي والمستشارين ..
- دمج

٣ - قاعة المحكمة / نهار داخلي

- عمر مسترسلا في مرافعته ..

عمر : .. ولم تأتي الرسالة المحمدية الا لتخاطب العقل وتدعوا الى التفكير وتنادي بالحرية .. الحرية التي خلت (بجلل) عبد زي سيدنا بلال .. حر الفكر والعقيدة رغم عبودية جسده لِسادة كفار .. وموكلي لم يفعل الا ان استعمل حرّيته في شرح الملتبس وتصحيح المغلوط والمختلف عليه .. وده اللي اقره يافندم الاستاذ عبد ربه من هيئة كبار العلماء والدكتور تهامي مشرف الرسالة ..

- يتابعه الجميع على اختلاف ردود افعالهم ...

عمر : (مسترسلا) .. لقد ابتلينا على اختلاف الازمنه بأقوام (للخصوم) يقولون مالا يفعلون ويفعلون ما لا يؤمرون .. (للقاضي) فمن جاهدهم بيده فهو مؤمن .. (موشرا باتجاه بدر) ومن جاهدهم بلسانه وقلبه .. فهو مؤمن ..

- الخصوم مستائين بينما القاضي يسمعه بانتباه وبدر وسجده منشرحا الوجه ..

عمر : .. كما وانه قد ورد ان بعض الصحابة بايعوا النبي على اركان الاسلام والنصح لكل مسلم .. يعني نصح المسلمين بالخير فريضة .. هيتحاسب عليها كل مسلم والساكت عنها شيطان اخرس ..

احد الخصوم : .. موكلك مش بيشرح ويصحح يا جهبذ .. ده بيجادل في مسلمات ..

عمر : (ملتفتا له) والرسول سمح بالجدال حتى لامهات المسلمين .. حضراتكوا مين بقى عشان تمنعوه ..؟

احد الخصوم : (للمحامي خاصتهم) ماتقول حاجه يامتر ولا الواد ده هياكلنا ..

عمر : (مسترسلا) ده غير ان المشرع افنى .. ان اللي بيجتهد على علم في امور الدين ويصيب فله اجران .. واللي يجتهد ويخطأ فله أجر .. يعني في خطئه معذور وعلى اجتهاده مأجور .. وسيدنا ابو بكر قال ان احسنت فأعينوني .. وان اخطأت فقوموني .. قوموني .. (للقاضي) قوموني يافندم .. مش ارفعوا عليا دعوة شرك عشان بقول رأيي ..

المحامي : (مندفعا) حرية التعبير ليها ضوابط شرعية يا بيه .. وسيدنا ادم لما جادل وتجاوز وعصى كان لازم يتعاقب ويتطرد من الجنة ..

عمر : .. وحضراتكوا بقى الالهة اللي قررت تعاقب الاستاذ بدر وتطرده م الجامعة ..؟

المحامي : (والخصوم معه) استغفر الله العظيم ..

عمر : (للقاضي) بدر حماد يافندم ليه ثلاث كتب غير رسالة ماجستير .. هل ثبت عليهم اي سفسطه او ازدراء للدين ..؟ .. هل كتبه او رسالة الدكتوراه مثار الجدل اتعرضت لحرمة الدين بأي تلاعب .. او طعنت في اسسه واركانه ..؟ .. هل تعرضت مؤلفاته لتضليل الناس وتوريطهم فيما يضر ..؟

المحامي : .. الاستاذ ابو كتب نضيفه بيروج للردائل والموبقات ..

عمر : .. الموبقات هي الدعوة لشيوع الفاحشه في اللذين امنوا .. هل ده وارد بشكل صريح او مستتر في اي جزء من اجزاء الرسالة ..؟

المحامي : (صامتا بغیظ)

عمر : .. الا اذا اعتبرنا ان تجديد الخطاب الديني .. وكشف تدليس الجماعات المتطرفه للارث النبوي من الموبقات والردائل ..

احد الخصوم : .. هذا الرجل يدعوا للكفر والالحاد ..

القاضي : (يطرق على المنصه امامه)

احد الخصوم : .. ولا بد ان يتوب الى الله وان يقوم بكل مايقوم به من ارتكب حد الرده ..

عمر : .. مانصلبه على باب الجامعة احسن ونحرقه هو والرسالة ..؟ (يتمتم الحضور بالضحك)

المحامي : (للقاضي) .. بدر حماد يدعوا لافكار شيوعية هدفها الشرك بالله وهدم الدين ..

عمر : (مدافعا) الرأسمالية المتطرفة هي اللي عايزه تهدم اسس الدين السليم وتمشي الكون باللي يتناسب مع مخططاتها ..

الجميع : (يتابع)

عمر : (متعجبا) .. انا مش فاهم .. ازاي يا اساتذه وانتوا في بيئة علمية والمسئولين عن مسيرة التقدم العلمي .. تبقوا انتوا نفسكوا قادة الرجعية واللي يختلف معاكوا تتهموه بالاحاد ؟ .. (للقاضي) يافندم القضية مش في محتوى الرسالة .. القضية في العقول اللي استقبلتها .. العقول اللي صعبان عليها اننا نفكر .. مين مش عايزنا نفكر .. مين من مصلحته اننا نبطل نفكر ..؟ .. مين اللي عايز يلغي عقولنا ويسيطر عليها ...؟

- دمج على صوت زغاريد

٤ - منزل بدر / الحمام / نهار داخلي

- عمر يرفع رأسه عاري الصدر امام مرآة الحمام مندى الوجه والجسد حليق الذقن ينظر لنفسه متخايلا .. بينما الزغاريد ضعيفه من الخارج من ام بدر ونسمع الحوار بينهما ..

بدر : .. كفايه بقى ياما ده انتي مزغردتيش كده في خطوبتي ..

الام : .. ايش جاب لجاب ..

عمر : (بيتسم)

بدر : .. طب بس لتسمعك ..

- يخرج عمر وقد ارتدى ملابس بيت خفيفه (تيشيرت وبنطلون) ليجد بدر امامه ..

بدر : .. ايوه كده نعيما ..

عمر : .. ايه الروايح الحلوه دي ..

بدر : .. خالتك وحدة عملالك حبة اتر وويكه تاكل صوابعك وراهم ..

- قطع

٥ - منزل بدر / سطح المنزل / غروب خارجي

- في الخلفية صوت ام كلثوم / هو صحيح الهوى غلاب
- بدر جالسا بينما وقف عمر مسحورا بمشهد الغروب ويظهر النيل بعيدا في الافق والاثنان يحتسيان الشاي ..

عمر : .. ياخي البلد دي اللي يشوفها من فوق زي اللي يشوفها من تحت .. حلوه من كل حته ..

بدر : .. ايه ياعم فتحي يانوفل هتشعر ولا ايه .. (متذكرا) لسه بتكتب شعر صحيح ..؟

عمر : (ساخرا) عملته شعر ..؟ .. ياعم كانت خواطر الواحد بينفس فيها ع اللي جواه ..

بدر : .. وجواك ايه دلوقتي ..؟

عمر : .. فاضي ..

بدر : .. يعني بحر اسكندرية بطل يحرك فيك الكلام ..؟

عمر : .. بحر اسكندرية هو اللي فاضل لي في العيشه الناشفه دي ..

بدر : .. طب ياابن الحلال متدورك على واحده تونسك ..

عمر : (نافيا) .. مش الونس اللي ناقصني ..

بدر : .. خلاص دورلك على واحده تحبها ..

عمر : .. بطلت ادور .. عايز الحب هو اللي يلاقيني المرة دي ..

- دمج

٦ - فوتومونتاج

- الخلفية الموسيقية اغنية الكون كله بيدور لمنير
- عمر بصحبة بدر وسجده في جوله بالكاريته
- يزورون الاماكن التاليه
- معبد ابو سمبل ... يلتقط فيه عمر اكثر من صورة للتماثيل الضخمة بينما يتحسس في احد اللقطات جدارية فرعونية عظيمة ..
- جولة نيلية نهاريه ... سجده وبدر يستغلان عمر في تصويرهما .. ونراه في كادر اخر يستقل مقدمة المركب يتأمل الاجواء شاردا حتى يمر يخت ثمين عليه حفلة صاحبه لمصريين واجانب (وهو نفس اليخت الذي سيظهر في مشهد قادم) فيتابعه عمر بتفحص حتى يبتعد ..
- السد العالي .. عمر ينظر له بشموخ من نقطة عاليه ...
- جزيرة النباتات ... ويلهون بينما يأكلون من فاكهة الموز .. وعمر يلتقط من موبايله بعض الصور للاشجار ..
- المسله الناقصه
- متحف النوبة ... بدر يلتقط لعمر اكثر من صورة انيقه ..
- اظلام

٧ - محطة قطار اسوان / ليل داخلي

- عند رصيف القطار يودع بدر عمر ..

بدر : .. تعيش يا صاحبي .. حررت الرسالة من ايد الابالسه دول ..

عمر : .. ياخويا يعني حررت القدس .. انت اللي ابن حلال وتستاehl كل خير .. الزيارة الجايه بقى
عايزين نيحي نباركلك ع الجواز ..

بدر : (مبتسما) نفرح بأمنية الاول (بينما يدفن لفه في قبضة عمر) ربنا يتم لها بخير ..

عمر : (يأبى اخذها) بس يا بدر بطل ع....

بدر : (مقاطعا) اسمع بس .. ده مش حساب تاكسي ولا باكو لبان هنتخانق مين يدفعه .. ده حق
شغلك .. والحق بره حسابات الصحوية ..

عمر : .. يا ابني كفاية استقبالكوا والحاجه اللي باعتينها معايا ..

بدر : .. لا وانت الصادق كفاية شغلك اللي سايبه وجاي لي من اخر الدنيا عشان تقف جنب
صاحبك..

عمر : .. ووقفه الصحاب بفلوس برضه ..؟

بدر : .. وقفك في المحكمة هي اللي بفلوس واقطم بقى ..

عمر : (ممتنا بينما يأخذهم مداعبا) .. كام دول ..؟

بدر : (ضاحكا) اللي معايا (ويحضنه مودعا) توصل بالسلامة ..

عمر : .. اشوفك على خير يا حبيبي ..

بدر : .. ربنا يستر طريقك .. طمني لما توصل ..

- وينصرف .. ولحظات حتى يرن هاتف عمر فيرد مبتسما ..

عمر : .. الو .. ايوه يا حبيتي .. اه خلاص هركب اهوه خشى نامي بقى .. يا حبيتي تستني مين بس دول ستاشر ساعة .. طب نامي وانا اول ما اوصل هصحيكي نفطر سوا .. بداره .. متضحكيش عليا وتفضلي صاحيه .. هكلم امنية بعد شويه تقولي انك نمتي .. محمد رسول الله .. سلام ..

- ويغلق الخط ملتفتا ليستقل القطار حتى يجدها امامه .. زهرة (بطلتنا / خمسينية لا يبدو عليها السن من جمالها/ بجرح غائر في خدها وملابس غاليه خفيفه على برودة الجو ترتدي نظارة شمسية وايشارب يغطي رأسها وبعضا من وجهها ويبدو عليها الارهاق الشديد) تسأله مرتعدة الفرائس وتظهر اللقطة من منظور كاميرا المحطة ..

زهرة : .. ده قطر اسكندرية لو سمحت ..؟

عمر : (لحظات قبل ان يرد) .. ايوه يافندم ..

- فتتحرك تركب ولحظات يتابعها قبل ان ينقاد خلف غموض طلتها وهو يصعد خلفها ..

- ساعة المحطة تعلن التاسعة مساء ..

- قطع

٨ - القطار / ليل داخلي

- العربية شبه فارغه الا من عدد بسيط من الركاب اكثرهم رجال ..
- زهرة تبحث عن مقعدها بمنتهى الهدوء والتوجس .. تجده لتكتشف انه بجانب رجل من عمرها فتجلس بهدوء وانكماش في الكرسي وهي تحتضن حقيبتها بجانب الشباك ..
- كل ذلك وعمر يراقبها من على مسافة بينما متصنعا وضع حقيبتها اعلى الرف قبل ان يجلس مكانه على كرسي منفرد ..
- لحظات حيرة وتدبر تنتابه قبل ان يقرر الوقوف مجددا متصنعا احضار شئ من حقيبته ليتمكن من رؤيتها .. ويجلس ..
- زهرة تتابع الحركة خارج النافذه بنظرات حذره بينما تحتضن حقيبتها ..
- لحظات قبل ان تشرذ خارج النافذه ..
- دمج

٩ - فلاش باك / فيلا اسوان / ليل خارجي

- زهرة الخمسينية (بنفس ملابسها السوداء) تمد الخطى بتوجس مذعوره في ممر مظلم نوعا
بينما ترتدي الايشارب وهي تتلفت حولها في حذر..
- دمج على صوت عزف بيانو / liebestraum ..

١٠ - فلاش باك / بهو فندق عمر الخيام / ليل داخلي

- زهرة الثلاثينيه شابه جميله بشعر منسدل تجلس على البيانو تعزف بشكل خلاب
- يدخل شخص من منظور الكاميرا بصحبة حاشيه وموظف من الفندق يرحب بيه بينما
يصطحبه للداخل ..
- الشخص يتابع زهرة باهتمام حتى يختفي داخل احد اروقة الفندق ..
- دمج

١١ - فلاش باك / صالة المطعم بالفندق / ليل داخلي

- يوم آخر
- زهرة الثلاثينية تتقدم نحو البوفيه تصنع لنفسها طبق وفور عودتها للطاولة تفاجأ بعلبة قطيفة بحجم كف اليد بجانب حقيبتها فتنادي الجرسون باستيلاء وهي تضع الطبق ..

زهرة : .. خيرى .. (يأتي) .. ايه اللي جاب العلبه دي هنا تانى ..؟

خيرى : .. استاذ شريف اللي امر نسيبها لك ..

زهرة : .. اندهولي ..

- ليتقدم نحوها شريف (اربعيني ببدة مشوق القوام) لينصرف خيرى ..

زهرة : .. انا عايزه افهم بقى فيه ايه ..

شريف : (وكأنه يتهمك) .. امرك عجيب ياست الحسن .. الراجل ليه غرض منك ..

زهرة : (تتركه بامتعاظ منصرفه)

شريف : (يمسكها فتقلته) .. غرضه جواز ..

زهرة : .. وانا مليش غرض من اصله ..

شريف : (بتهمك ثانية) لأ .. ده مش شريف الغلبان اللي حيا الله مدير المطعم (بنيرة عتاب) اللي اتقدم

لسيادتك ورفضته .. ده واحد م اللي احلامهم اوامر .. اللي رفض طلباته جريمة يعاقب عليها القانون ..

زهرة : .. يعني ايه جواز بالاكراه ..؟

شريف : .. احمدي ربنا انه جواز مش حاجه تانية ..

زهرة : (بنظرة)

شريف : .. زهرة انتي ست شافت كثير قوي في حياتها .. ومتأكد انك بطلتي تحسبها حسبة الحب
والعواطف دي عشان كده رفضتيني .. اوزنيها بالعقل واستوعبي انتي عايزه ترفضني مين ..
.. ده اشرف بركات ..

- دمج على صوت صافرة القطار ..

١٢ - القطار / ليل داخلي

- زهرة تنتفض فزعه من صوت الصافره ومن تذكرها للاسم وكأنها تسمعه توا وهي تبلع ريقها ..
- يتحرك القطار ..
- دمج

١٣ - فلاش باك / فوتومونتاج / شقة زهرة / نهار داخلي

- شقة متواضعه بأثاث ذوقه قديم متوسط الحاله ..
- زهرة الثلاثينية في المطبخ المتواضع بملابس البيت تغسل المواعين
- تجفف يدها في ملابسها وتلتف تقلب الطعام في قدر على النار
- تخرج من احدى الغرف تحمل كومة ملابس بينما يدق جرس الباب
- يفتح والدها (ستيني نحيل) لنرى شخصا يحمل صندوق قيم متوسط الحجم يقدمه له

الشخص : .. استاذ زهرة موجوده ..؟

زهرة : (تتوقف وهي تسمع اسمها) .. ايوه ..

الشخص : .. الفندق باعت لحضرتك الهدية دي ..

زهرة : .. باعتلي انا هدية ليه ..؟

الشخص : .. بمناسبة العيد يافندم .. راح زيها لكل الموظفين ..

زهرة : (لوالدها ثم له) .. طيب ماشي ..

- لياخذها الوالد ويغلق الباب ..
- وعلى الطاولة تفتحها زهرة لتجدها تفتح بطريقة مبتكره ليظهر بداخلها بوكيه ورد مدهش
- وداخل كل وردة يلمع فص من الالماظ وبه كرت كتب عليه " مش شايفك غير كده .. زهرة بقلب الماظ "
- تسرع للباب تبحث عن الشخص وتنادي عليه لتجده قد اختفي .. تسرع للبلكونه تطل منها ولا ترى له اثر ايضا .. فتقف من بعيد تنتظر للبوكيه بتدبر ووجه صامت ثم لوالدها ..
- دمج

١٤ - فلاش باك / شقة زهرة / ليل داخلي

- تخرج من المطبخ بصينية بها كوبان من الشاي وتتوجه للبلكونه حيث يجلس والدها مدخنا يتابع الشارع لتجلس في مقابلته .. تقطف ورقة نعناع من حوض جانبها وتضعها في كوبه وتقدمها له فيأخذها متتهدا وتلاحظه .. لحظات ..

الاب : .. طب ما لو فيه حد تاني في دماغك قوليلي ..

زهرة : .. ولا تاني ولا تالت ..

الاب : .. امال بترفصي نعمة ربنا ليه ؟..

زهرة : .. عشان מבحبش طريقة زغلة العين دي ..

الاب : .. ماهو جالك بالكلام بس مجتيش .. ومن وقت ما كنتي بتدي بنت اخته دروس مزيكاه وهو بيحاول معاك مفيش فايده .. قال اما يوريكي شكل الدنيا اللي مستنياكي يمكن تغيري رايك ..

زهرة : (تندبر بقلق)

الاب : .. ياستي وافقي ومنتش خسارانه حاجه .. اتفقتوا وطلع ابن حلال يبقى طاقة قدر واتفتحت لك .. محصلش نصيب اعتباريها اعارة .. طلعتيلك منها بقرشين ينفعوكي للزمن ..

زهرة : (وكأنما تحدث نفسها) .. ياخوفي اجي اسيب الاعارة هي اللي تمسك فيا وتسحب عمري معاها سنة ورا التانيه .. (وتنادي باتجاه الداخل) .. يا عمر ..

- دمج على ٢. Russian Funeral March n.

١٥ - جناح فخم في فندق / ليل داخلي

- الموسيقى مستمرة
- زهرة الثلاثينية عروس في فستان زفاف ملكي بديع ..
- تقف امام مرآة ضخمة بينما عدد من الاشخاص يجهزونها ..
- ملامحها صامته تتفحص صورتها في المرآة بشرود ..
- واخيرا يضع احدهم تاج مرصع بالالماظ على رأسها ..
- لقطة على الساعة تعلن العاشرة
- اظلام

١٦ - القطار / ليل داخلي

- عمر مشبك الذراعين شاردا خارج النافذة ثم منتبها ينظر في ساعته ..
- لحظات حتى يرى الشخص بجانب زهرة يقوم سائرا ويمر بجانبه ..
- ينتبه له عمر ويدور برأسه شئ سريعا
- لحظات انتظار ويعود الرجل فيستوقفه عمر ..

عمر : (بابتسامه عريضه) مساء الخير ..

الرجل : .. مساء النور ..

عمر : .. معلش بس كنت عايز استأذن حضرتك في حاجه ..

الرجل : .. اتفضل ..

عمر : .. اصل المدام اللي جنب حضرتك تبقى مراتي .. وكنا في رحلة لاسوان وللاسف اتخانقنا
خناقة كبيره والشيطان دخل بينا وكل واحد حجز لوحده .. فبستسمحك يعني لو تبدل معايا مكانك
وتديني فرصة اصالحها ..

الرجل : (متفحصا هيئته) .. معلش يعني وانا اعرف منين انها المدام ..؟ .. ده انت حتى مش لابس
دبله ..

عمر : .. بقولك متخانقين .. انت ايه حضرتك متخانقتش مع المدام قبل كده واول حاجه عملتها انك
تطوح الدبله بطول دراعك .. وبعدي....

- لتقاطعه رنة هاتفه فيرد من فوره ...

عمر : .. الو .. ابوة يا عزت .. اه بلغ سيادة اللوا اني في الطريق ..

الرجل : (يستوعب)

عمر : .. القطر هيوصل.... (مستفهما من الرجل بحركاته) ...

الرجل : (ملهوفا) ١٢ الضهر يافندم ..

عمر : .. اه ١٢ الضهر .. اه يعني على واحده كده انا عنده في المكتب .. (في وجه الرجل) وبلغ النقيب يوسف يجهز ملف الاعتقالات ..

الرجل : (يتوتر)

عمر : .. تمام .. مع السلامة (ويغلق الخط) .. أ...

الرجل : (مقاطعا) هو كرسي حضرتك نمره كام ..

عمر : .. مش هتستنى ادورك ع الدبله ..

الرجل : .. ياباشا ربنا يصلح لكوا الحال ويبعد عنكوا الشيطان ابن الكلب اللي بيحبب كلام غريب على لسان الواحد ..

عمر : (له مؤشرا) كرسي ٣٩ ..

الرجل : (متحركا) اتفضل ياباشا اتفضل ..

- عمر يكتم ابتسامته متوجها لكرسيه الجديد ويجلس .. تنتبه زهرة لجارها الجديد
- يجلس بوجه منفرج يبادلها نظرة فتلتفت للشباك بهدوء حتى يرن هاتفه مجددا ..

عمر : .. ايوه يا حبيبيتي .. لا مفيش هابقي احكيلك لما اجي .. انتي منمتيش ليه لدلوقتي .. ياستي والله العظيم ركبت وكله تمام متقلقيش ... ماشي .. يلا وانت من اهله .. سلام ..

- ويغلق الخط ويسود الصمت لحظات حتى يمر عامل البوفيه ...

العامل : .. تحبوا تشربوا حاجه ..؟

عمر : (فينظر لها)

زهرة : (تشيح بوجهها للشباك)

عمر : (له) .. شويه ..

- ويسود الصمت مجددا ..

- وتعود زهرة تشرد من النافذه ..
- يتفحصها عمر فلا يجد في يدها اليسرى خاتم زواج .. وتدل ملابسها على مستوى معيشي
- عالي بشارات الماركات التي ترتديها .. بينما يلاحظ اصابعها التي تحتضن بها جسدها بقوة..
- لحظه ويرن هاتفها في الحقيبة بصوت منبه فتتنفض وهي تخرجه وتغلقه نهائيا وتضعه
- بالحقيبة وتخرج علبة دواء تتناول منه حبايه تبتلعها بينما يتابعها عمر ..

عمر : .. تحبي اطلبك ميه ..؟

- فتكتفي بالنظر له ثم الالتفات للنافذه لتشرد من جديد ..
- دمج

١٧ - فلاش باك / فوتومونتاج / فيلا فخمه / ليل داخلي

- زهرة الثلاثينية في الغرفة النوم بملابس خفيفه ممدده على سرير بجانبها زوجها اشرف
- رجل ممشوق عاري الصدر لا يظهر وجهه يغط في النوم ..
- تدفأ ذراعيها بكفيها وهي تتابع النظر عليه في تدبر ..
- تتوجه للواجهة الزجاجية تنظر من خلفها على الحديقة الواسعه يتوسطها جلسة حمام السباحة وبعض السيارات الفارهه جانبا ..
- تشعل سيجارة وتخرج من الغرفة وعند غرفة اخرى تفتح الباب لنرى طفلا في الثامنة نائما في سريره والغرفة مليئة بالالعاب ..
- تنزل درجات السلم بينما نرى فخامة المكان ..
- في البهو تفتح غطاء البيانو الكودا وتتحسس اصابعه ..
- تجلس وتعزف عزف خلاب لمقطوعة moonlight beethoven
- لحظات ونرى خطوات حافيه تهبط درجات السلم وكأنها لغول ..
- ليظهر اشرف بركات زوجها بروب مفتوح يقترب خلفها .. فور لمسها لتنتفض فزعه وهي تلتفت له تقبض على صدرها ..

زهرة : .. انا مش قلتلك تبطل تطلعلي كده زي العفاريث .. (لتننبيه انه عاري الجسد تحت الروب فتغلقه) وازاي تنزل بالمنظر ده انت فاكرنا لوحدنا ..؟

اشرف : (محاوولا تطويقها) .. بلاقي نفسي بتحرك زي المجذوب وانا بسمعك .. ببقى هتجنن عليكي ..

زهرة : .. طب يلا نطلع ..

اشرف : (ببرود) .. يلا ..

- بينما يغلق غطاء البيانو ويرفعها يجلسها عليه وهي تستوعب بانزعاج ..
- يتسلق كرسي البيانو ليصبح بجانبها بينما يداعبها فتفهم مقصده بفرع محاوله التملص منه مع احتفاظها بهدوء صوتها المحتد وهي تحاول ايقافه ..

زهرة : .. ايه اللي بتعمله ده احنا مش لوحدنا ..

اشرف : (في اذانه وقرا)

زهرة : .. يابني ادم البيت مليون شغالين (بانزعاج) ممكن حد يطلع علينا وعمر ممكن يصحى في اي وقت

اشرف : (بعصبية) يلعن ابوه ..

- لتتعالى فورته ويتعالى صوتها حتى نرى عمر يخرج من غرفته بالاعلى يفرك عينه فتنتبه له زهرة بينما تصرخ على المربية ومازالت تحاول التملص منه ..

زهرة : .. امينة .. امينة ..

- تخرج المربية من احدى الغرف بينما استطاعت زهرة التخلص منه والهبوط ارضا ..

زهرة : .. رجعي عمر اوضته واقفلي الباب ..

- وقد بدأ عمر في البكاء فزعا فتدخله المربية غرفته بالقوة وتغلق الباب ..

- تلمم زهرة شتات ملابسها وشعرها بانفعال ..

زهرة : .. وحياة ابني ما هعدي اللي حصل ده بالساهل ..

- دمج

١٨ - القطار / ليل داخلي

- زهرة تستند برأسها للخلف بامتعاض بينما تتذكر
- يلاحظها عمر فيحاول فتح حوار ..

عمر : .. حركة القطر مدايكاكي ..؟

زهرة : (امامها)

عمر : .. انا اصلي حسيت نفس الاحساس ده اول مرة اركب فيها قطر .. (مداعبا) بس انا بقى رجعت ..

زهرة : (تنظر للنافذه)

عمر : .. في الحمام يعني .. (مستطردا) بعد كده بقى عرفت اني مش لازم ابقى متقل في الاكل قبل ما اركب

زهرة : (في النافذه)

عمر : .. ولو اني كنت عند جماعة معرفه دفسوني اكل م الاسواني ..

زهرة : (في النافذه)

عمر : .. جربتني الاكل النوبي قبل كده ..؟

زهرة : (له)

عمر : .. شطة قوي ..

زهرة : (للنافذه)

عمر : .. بس اتضح بقى ان الشطة دي مفيده جدا للجسم .. تصوري ان دكاترة الجهاز الهضمي نفسهم بينصحوا بيها .. بيقولوا بتنظم حركة الامعاء ..

زهرة : (له)

عمر : .. بس مش كتير بقى عشان بتقلب بنكد ..

زهرة : (للنافذه)

عمر : .. شكلها هتقلب بنكد ..

- ليقرر ان يخرج هاتفه يقلب به قليلا ..

- وتشردهي من جديد ..

- دمج

١٩ - فلاش باك / فيلا زهرة / غرفة النوم / نهار داخلي

- زهرة على اريكه دامعة العينين واشرف على مقربه منها يتحدث بلسان ثقيل ..
- اشرف : .. سيرة الطلاق دي تنسيها خالص .. انا بحبك يا زهرة مقدرش استغنى عنك ..
- زهرة : .. ده اللي تعرفه عن الحب ؟ .. اني ابقى فار تجارب تشوف عليه تأثير القرف اللي بتاخده..؟
- اشرف : .. دي حاجات المفروض تبسط الست قبل الراجل ..
- زهرة : .. ومفضلتش ليه مع المبسوطه بتاعتك ..؟
- اشرف : .. دي مره صبحت عضمه كبيره ملهائش في الانبساط ده ..
- زهرة : (بانفعال) ومين قالك ان الانبساط ده يلزمني ..
- اشرف : (بضيق) .. انتي اعصابك تعبانه .. تعالي نساقر اي حته ..
- زهرة : .. مش هيتغير غير المكان ..
- اشرف : .. خلاص هاتي عمر معانا ..
- زهرة : .. هو طابقك هنا عشان يطيقك في سفره ..؟
- اشرف : .. انتي السبب ..
- زهرة : .. مستني ايه من طفل بيصحى كل يوم مفزوع على صريخ امه ..؟
- اشرف : .. انتي اللي مش مفهماه ان ده طبيعي بين المتجوزين .. (يطوقها) .. خلاص ياستي ..
- خلينا نساقر واو عدك مفيش انبساط ..
- زهرة : (له)
- اشرف : .. انبساط م اللي بيدايك يعني ..

- دمج

٢٠ - فلاش باك / فوتومونتاج / مدينة العاب بالخارج / نهار خارجي

- زهرة مع اشرف وعمر يتنزهون بينما يحتضنها اشرف مقبلا رأسها
- ينتقلون بين الالعب بضحك ..
- اشرف يصور زهرة مع عمر
- زهرة تصور اشرف يحمل عمر
- عمر يصور اشرف وزهرة بينما يضمها متفحفا وجهها وجسدها بشهوة
- دمج

٢١ - فلاش باك / فندق / ليل داخلي

- من امام احدى الغرف نسمع زهرة تصرخ
- اظلام

٢٢ - القطار / ليل داخلي

- زهرة بامتعاظ وكأنها تتذكر شئ مقزز بينما يستطرد عمر مشيرا لها على شئ في هاتفه ..

عمر : .. تصوري بيقولوا.....

زهرة : (تباغته بانفعال) لو سمحت من فضلك كفاية كلام بقى ..

- مقتضبا بنظرة عتاب ثم تشعر وكأنها اندفعت ..

- يقرر الانسحاب بهدوء عائدا لكرسيه .. وفور رؤية الرجل له يترك الشاي في يده ويهب

واقفا ..

الرجل : .. ايه يافندم ربنا مهداكوش لبعض ولا ايه ..؟

عمر : (بايماء مقتضبه لا)

الرجل : (متنهدا) لا حول ولا قوة الا بالله .. (ليبتسم باتجاه زهرة مؤشرا لعمر باتجاهها) .. لا والنبى

ده الحبيب شكله رق ..

- فيلنفت عمر ليجدها تطل برأسها من جانب الكرسي وقد خلعت نظارتها ثم تعود لتخنفي

- فيبتسم وهو يربت على كتف الرجل ويعود يجلس بجانبها .. لحظات ..

عمر : .. انا عمري ما عملت كده على فكرة .. ولا عمري فكرت اتطفل على حد .. وبجد مش

عارف ايه اللي بعمله ده .. لكن .. (متردددا) يمكن عشان مكتوب على وشك انك .. محتاجه حد

معاكي ..

- ويتبادلان النظرات .. وتطمئن ..

عمر : (معرفا نفسه) .. عمر ..

زهرة : (تغمض عينها ألما)

- دمج على صرخه

٢٣ - فلاش باك / مقبرة في تونة الجبل / ليل داخلي

- عمر ابن زهرة شابا في العشرين يسقط في هوه عميقه داخل المغارة وقد دفعته يد ليسقط بها صارخا ..
- دمج

٢٤ - القطار / ليل داخلي

- زهرة لازالت مغمضة العينين ..
- يلحظ عمر سلسله في رقبتها عليها اسم عمر ..
- عمر :** (معتذرا) انا .. انا ..
- تومئ له بكف مرتعش انها بخير
- يستشعر ارتعاشة جسدها ايضا فيسرع لحقيبته يخرج منها غطاء صغير يضعه عليها ..
- لحظات وتهدأ بينما يتابعها .. ويستوقف عامل البوفيه ..
- عمر :** .. ازازه ميه لو سمحت ..
- ويتابعها لحظات حتى يحضر الماء ويعطيها فتجرع رشفه ..
- عمر :** .. اشربي كمان .. الميه بتفوق ..
- تتدبر الكلمة قبل ان تتجرع من الماء بظماً وعمر يتابعها مستفهما ..
- دمج

٢٥ - فلاش باك / فيلا زهرة / ليل داخلي

- زهرة الخمسينية بملابس بيت فوقه قميص رجالي في حاله جنونية تحصل على احدى زجاجات الخمر من البار وتفتحها لتشرب منها بشراهة عدة مرات لتنتابها حالة قئ تسقطها ارضا وهي تخرج ما في جوفها بصراخ ..
- اظلام

٢٦ - القطار / ليل داخلي

- موسيقى الخلفية اغنية حبيبي يسعد اوقاته تصدر بصوت خافت من تليفون رجل يجلس على بعد كراسي من كرسي زهرة ..
- اما الرجل في كرسي عمر يتحدث في الموبايل ..

الرجل : (مسترسلا) ايه يابت الفيلم اللي يقطع القلب ده ..؟ .. كملته ليه ..؟ اهو كملته وخلص ده انتي بارده .. اهي اي حاجه تطوي السكة .. بس ياساتر .. معقوله الدنيا بيحصل فيها كده ..؟

- وعند زهرة وعمر وقد استرخى كل منهما برأسه على كرسيه لتغط زهرة في نوبة ذكريات ..
- دمج

٢٧ - فلاش باك / فوتومونتاج / نهار خارجي

- الاغنية مستمرة
- زهرة الثلاثينية حامل في شهرها الاخير بينطال وقميص فضفاض تتسوق بعض اغراض المواليد بسعادة من بائعي منطقة الازهر والعتبة ..
- تتسوق بعض الالعب البلاستيكيه الرخيصه
- تتجول وسط الباعه والمحلات وهي تقضم من كوز درة ..
- تشتري تيشيرت رجالي بينما تقيسه بأن تضعه عليها مبتسمه وهي تتحدث مع البائع ..
- عند محل عصائر تقف محمله ببعض الاكياس تشرب قصب وهي تتابع حركة الشارع ..
- تؤشر لاكثر من تاكسي وسط الزحام حتي يقف احدهما فتركب ..
- دمج

٢٨ - فلاش باك / شقة زهرة / ليل داخلي

- الاغنية مستمره
- زهرة الثلاثينية تدخل من باب الشقة في سعادة محمله بالاكياس لتنتبه الى والدها الذي انزوى في احد الاركان يبكي فتسرع اليه تجلس بجانبه ليخبرها حزينا بشئ ما يدفعها للانهييار وهي تصرخ باكيه تمسك بطنها في الم ..
- دمج

٢٩ - القطار / ليل داخلي

- الاغنية مستمره

- زهرة تمسح دموعها بيدها فينتبه لها عمر ..

عمر : .. مدايقك الصوت ا قوله يطفيه ..؟

زهرة : (تومئ لا)

عمر : (لحظات في وجهها بدفئ) .. على فكرة انا عارف انتي مين ..

زهرة : (امامها بتوجس تبلع ريقها)

عمر : (يرن هاتفه) .. ابوه يا ممل .. لأ بقولك ايه .. هو سي زفت ده يرازيك بشغل عايز تقرفني

بيه معاك طول الليل .. (لحظه) .. ارغي ياخويا .. (لحظات) .. طب ما تطلبوا البصمة وانتوا

تعرفوا قتله بسلاح نوعه ايه ...

زهرة : (تضطرب ملامحها)

- قطع

٣٠ - فلاش باك / فيلا اسوان / ليل داخلي

- زهرة الخمسينية بنفس ملابسها السوداء تحمل مسدسا تطلق منه رصاصة بفرع ..
- قطع

٣١ - القطار / ليل داخلي

- الاغنية مستمره وتهدأ حتى تختفي
- تربش عين زهرة من تذكرها لصوت الرصاصة بينما يسترسل عمر ..

عمر : .. انت ناسي حادثة دشنا اللي قالك الاربعة ماتوا بطبجتين ولما فحصوا الفارغ بالبصمة طلع كان فيه آلي في الموضوع ..؟ .. الله ينور عليك .. والرقم ده تنساه بقى الليلة دي .. اه في ايدي شغل في القطر .. يلا يا مهزق .. سلام .. (ويغلق الخط ولزهرة مباحتا) .. مقولتليش بقى .. مين عمر ..

- دمج

٣٢ - فلاش باك / منطقة سقارة / نهار خارجي

- عمر ابن زهرة العشريني في جلسة تصوير .. ويبدو انها لشئ مهم حيث يبدو انيق جدا ..
- عند الكرفان تجلس زهرة الخمسينية تتابعه بحب بجانبها فتاة جميله من عمره ..
- وفور انتهاءه يذهب اليهما ..

عمر : .. ها ..

الفتاة : .. شغال ..

عمر : (لزهره) .. ايه ..

زهرة : (تؤشر له ان ينتظر بينما تتمم بالاذكار ثم تقربه لها تمسح رأسه بكفيها)

عمر : (مبتسما يقبل باطن كفها) .. في النص بقى ادعيلي يقبلوا الاوديشن ..

زهرة : (تنهي تمتتها وبامتعاض) دول هيقبلوه ويتحايلوا عليك كمان وانت اللي تقول لهم هفكر ..

عمر : .. ليه مخلفه دانيال داي لويس ..؟

زهرة : .. ده اجمد م النابلسي ..؟

عمر : (مبتسما بينما يجذبها من يدها) لا طبعا النابلسي اجمد .. (ثم يجذب فتاته وللمصور) شيكو ..

كام صورة بقى كمان مع المزرد دي ..

- ويلتقط لهم عددا من الصور مع بعضهم .. وبين زهرة وعمر وبين عمر وفتاته بينما

يضحكون

- دمج

٣٣ - القطار / ليل داخلي

عمر : (مسترسلا) .. ابنك ..؟

زهرة : .. عمري ..

عمر : .. امال اتدايقتي ليه لما سمعتي اسمه .. هو مزعلك ..؟

زهرة : (تومئ لا بحب وشجن) .. عمره ما ز علني ..

عمر : .. ربنا يخليهولك ..

زهرة : (له) .. ربنا يرحمه ..

عمر : (لحظه متأثرا) .. انا اسف ..

- وتسود لحظات صمت ..

عمر : .. تشربي حاجه دافيه ..؟

زهرة : (وقد قررت القبول فتومئ نعم)

- اظلام

٣٤ - القطار / ليل داخلي

- لقطات متفرقة للاشخاص في العرببة يغطون في النوم
- وفي سكون العرببة الا من صوت سير القطار نسمع عمر مسترسلا في حديث مع زهرة ..

عمر : .. اول مرة تركبي قطر ..؟

زهرة : (تومئ لا)

عمر : .. مستواها اتحسن قوي عن زمان ..

زهرة : .. يمكن ..

عمر : .. امال قطر ايه اللي ركبتيه قبل كده ..؟

زهرة : .. الجولدن ايجل ..

عمر : (متفاجأ باعجاب) .. والو ..

زهرة : .. كلهم بالنسبة لي وسيلة مواصلات ..

عمر : .. ده تواضع ولا زهد ..؟

زهرة : .. ده أنا .. مش مهم راكبه ايه .. المهم راичه فين ومع مين ..

عمر : (مبتسما بهدوء في عينها)

زهرة : (تشبيح بوجهها)

عمر : (منتبها يغير الموضوع) بايخه قوي حكاية اننا مش هنقف غير في محطة واحده دي ..

زهرة : .. مش مستعجل تروح ..؟

عمر : (في عينها يومئ لا)

زهرة : (تتخرج)

عمر : .. لكن بصراحة الفترة دي كلها من غير سيجارة موترني ..

زهرة : .. ليه مخليها متمكنه منك كده ..؟

عمر : (في عينها من جديد) مش بإيدي ..

زهرة : (تلتفت للنافذه وكأنها تنهي الحديث)

- لحظات ..

عمر : .. معنديش ولاد تانيين غير عمر ..؟

زهرة : (بشجن تومي لا)

عمر : .. ربنا يرزقك انتي وبياه ..

زهرة : .. الله يرحمه ..

عمر : (تختلط في وجهه مشاعر الفرحه والتظاهر بالحزن) .. انا اسف ..

زهرة : (ساخره) .. اتأسفت على ميتين كثير قوي النهاره ..

عمر : (سعيدا بانفراجة وجهها) اسف واجب .. واضح انك شفتي كثير وانتي لسه في عز شبابك كده

..

زهرة : (بتهمك) .. شبابي ..؟

- وتستلقي برأسها بتهيئه تنظر بزاوية وكأن شريط عمرها يمر امامها

- دمج

٣٥ - فلاش باك / فوتومونتاج

- زهرة الثلاثينية في حفل زفافها على اشرف
- زهرة الثلاثينية في غرفة الولادة تصرخ
- زهرة الثلاثينية في جلسة عائلية وهشام (الثلاثيني) يلبسها دبلة خطوبة
- زهرة الثلاثينية على البيانو في الفندق وقتما رآها اشرف
- زهرة الثلاثينية امام حضانة تنتظر عمر طفلا في الرابعة ليركض نحوها فور رؤيتها
- زهرة الثلاثينية في حمام شقتها المتواضع تحمم صغيرها ويضحكان بينما يرشها بالماء
- هشام يقود سيارته ليلا في طريق سفر يصطدم بسيارة جيب تقلبه من على الطريق
- عمر ابن زهرة العشريني يقع في البئر داخل المغاره
- زهرة الخمسينية في الفندق تطلق الرصاص على احدهم
- اظلام

٣٦ - القطار / ليل داخلي

- زهرة في غفوه تفيق منها فزعه على حركة توقف القطار فلا تجد عمر بجانبها
- تتلفت بقلق حولها فلا تراه فتقرر ان تقوم بتحفظ من مكانها لتبحث عنه
- تنظر لموضع حقيبته على الرف فتجدها مكانها فتهدأ نوعا
- تسير خطوات في العربة باتجاه الباب بينما تنتظر من الشبابيك لتراه داخل كافييريا المحطة
- يحاسب على شئ فتنفوس الصعداء ..
- قطع

٣٧- القطار / ليل داخلي

- عمر يصل لمكان جلوسه فلا يجد زهرة
- يفرع وهو يتلفت حوله يبحث عنها
- وعند الرجل الذي ابدل معه الكرسي يوقظه فيفرع الرجل

الرجل : (بفرع وهو يفيق) انا معملتش حاجه ..

عمر : .. لو سمحت مشفتش المدام ؟..

الرجل : (مستوعبا) مدام مين ؟.. اه .. لأ .. لا مشفتهاش ..

- ليرد عليه رجل اخر في كرسي قريب ..

الرجل ٢ : .. حضرتك نزلت وشويه ونزلت وراك ..

- فيتلفت عمر حوله من جديد ناظرا من الشبابيك ثم الى الباب يبحث عنها الى ان يتلفت فيجدها خلفه
- يتبادلان نظرات اللوم والعتاب ويبتسم لها براحة ..
- دمج

٣٨ - رصيف المحطة / ليل خارجي

- ساعة المحطة تشير الى الرابعة فجرا
- القطار مازال متوقفا ونرى يافطه عليها اسم محطة اسيوط
- زهرة وعمر يجلسان على احد المقاعد يتحدثان بينما يدخان ..

عمر : (مسترسلا) .. جدي عبدالرؤوف بقى كان من فريق دفاع مصطفى بيه امين في قضية انحراف المخابرات ..

زهرة : .. ده العيله كلها محامين على كده .. (مداعبه) عايشين ازاي مع بعض ..؟

عمر : .. امنية بس اللي كسرت النحس ودخلت اداب .. هي وخطيبها لغات شرقية .. كان سابقها بكام سنة وهو اللي طلعتها في دماغها .. (ساخرا) لما بيعدوا يتكلموا مع بعض عبري بحس اني عايز اقوم الزقهم بالققا ..

زهرة : (بابتسامة اقرب الى الضحك)

عمر : (لها معجبا بابتسامتها)

زهرة : (تنتبه فتصمت بخجل)

عمر : .. انتي صحيح .. راичه ولا راجعه اسكندرية ..؟

زهرة : (تنتبه بوجه صامت وبتردد) لا .. راичه لجماعة معرفة ..

عمر : .. شكلها زيارة سريعه مش محتاجه شنت ..

زهرة : (صامته)

عمر : .. انما انتي اصلا من اسوان ولا....

- تقاطعه صافرة القطار تعلن عن تحركه فينظران باتجاهه ثم لبعضهما فيبتسم لهما
- يصعدان القطار بينما هي تتقدمه وفي الطريق لكرسيهما يبتسم لهما الرجل ..
- يجلسان يتبادلان النظرات حتى نسمع اذان الفجر ..
- تنكئ زهرة برأسها براحة تتابع من النافذة خطوط الفجر الاولى بينما يتحرك القطار ..
- دمج

٣٩- فلاش باك / شاطئ بحر / شروق خارجي

- زهرة الثلاثينية مع هشام يسيران بمحاذاة المياة يتحدثان ثم يتوقفان ليقبلها ثم يترك نفسه ليقع على ظهره في الماء وهي تضحك بشده ..
- دمج

٤٠- القطار / شروق داخلي

- زهرة تبتسم من ذكريات المشهد السابق بينما تنظر لعمر وهو يخلع جاكنته ثم تتابع النظر من النافذة
- اظلام

٤١ - القطار / نهار داخلي

- الساعة تعلن السابعة صباحا من ساعة يد احد الركاب
- زهرة في غفوة وقد سقط رأسها على كتف عمر بينما يتحدث في هاتفه يحتسي الشاي بوجه منفرج سعيدا بالتصاقه في زهرة بينما محدثه منفعل اما هو فحريص على هدوءه لعدم ايقاظها ..

عمر : .. ممم .. اه .. وده حصل ازاي ده يا حاج ..

الصوت : .. القلم .. هو القلم اللي ادهولي اكتب بيه .. انا متأكد انه كان من ابو حبر بيتمسح .. وانا نزلت من هنا وهما بيضوه من هنا ونقشوا اللي على مزاجهم ..

عمر : (مع زهرة) .. ممم ..

الصوت : .. ممم ايه بس يامتر ماتركز معايا كده شويه الله يصلح حالك انت لسه نايم ولا ايه ..

عمر : (مفتعلا التناوب)

الصوت : (منزعجا) بقولك ايه يامتر فوق وكلمني سلام ..

- ويغلق الخط يستمتع بجمال الموقف حتى ينتبه ان اشعة الضوء مسلطه على وجهها فيمد يده يغلق الستارة فتفريق منتبهه لرأسها وهي تعتدل بانحراج ...

زهرة : .. احنا فين ..؟

عمر : .. في الجنة (منتبها) في القطر .. في .. داخلين ع الجيزة ..

زهرة : .. وفاضل قد ايه على اسكندرية ..؟

عمر : .. يعني .. بتاع اربع خمس ساعات كده ..

زهرة : (تتنهد بقلة حيله من النافذه) .. نفسي القطر يفضل ماشي ..

عمر : (لها)

زهرة : .. ليه كل حاجه لازم بيقى ليها اخر ..؟

عمر : .. عشان لا فرح يدوم ولا حزن كمان يدوم ..

زهرة : .. وليه منعشش سعدا كلنا على طول ..؟

عمر : .. امال ربنا يختبر صبرنا ع البلاء ازاي ..؟

زهرة : .. وليه نتعذب ..؟

عمر : .. ربنا مبيتكش غير ع اللي عايز يسمع صوته .. اللي عايزه بيقى قريب منه وليل نهار بيكلمه ..

زهرة : .. واللي يتعب يعمل ايه ..؟

عمر : .. يبص ع اللي متعذب اكثر منه عشان يعرف انه في نعمه ..

زهرة : (تتنفس)

عمر : (في عينها) .. تفطري ايه بقى ..؟

زهرة : (في وجهه بانفراجة)

- دمج

٤٢ - القطار / نهار داخلي

- عمر وزهرة يتحدثان بينما تحتسي الشاي ويلتئم هو سندوتش في يده ..

عمر : (مسترسلا) مانا لازم اريحه .. اصل المحامي ده بيعع ساعات مع موكلين قضيتهم ضايعه ضايعه .. فلانم يقلب دكتور ويديله الامل حتى لو حالته ميئوس منها ..

زهرة : (تتابعه)

عمر : .. وعالم تانيه الادب والذوق مبينفعش معاها .. عارفه .. مرة في اول فترة ليا في الشغل استنفذني واد حيوان كده لحد ما لبسته روسيه في مناخيره ..

زهرة : (متفاجئه)

عمر : .. ليه وليه مجبتلوش حكم لصالح اخوه .. هلفظ بكلمتين خايبين روحته بثلاث غرز ..

زهرة : .. وانت روحت بايه ..؟

عمر : (ساخرا) .. شهر حبس ..

زهرة : .. طب ومجبتلوش حكم ليه ..؟

عمر : .. مفيش كانوا مفهميني انها قضية شرف .. واحد قتل مراته عشان بتخونه .. اتاريه قاتلها وسارق صيغتها عشان يتجوز عشيقته ..

زهرة : .. وبعدين ..؟

عمر : .. بس واحنا في الجلسة لقيت محامي القتيله عمال يفصص كل حاجه بالادلة .. حسيت اني راجل بقرون جايبينه يعرعر عليهم باي كلام اهل سبت لهم القاعة وخرجت ..

زهرة : (له)

عمر : .. بصي انا מבحبش العك .. ولا بحب استغل شغلي لاي حد لمجرد انه هيدفع ..

زهرة : (تسرح)

- دمج

٤٣ - فلاش باك / فيلا زهرة / غرفة النوم + الحمام / ليل داخلي

- زهرة الخمسينية في حمام الغرفة بالروب تغسل اسنانها بينما تسمع اشرف يتحدث في سماعه الهاتف ويقلب في شاشته يشاهد فيديو لكتشاف اثري ضخم في مصر .. عاري الصدر ممددا على السرير يدخن سيجار ..

اشرف : .. جرى ايه يا فريد .. بقى حته ادارة شئون قانونية في بنك هتعتل لنا الشغل ..؟ .. امال انت وطقم البغال اللي معاك دول بتعملوا ايه ..؟ (ساخرا بوقاحه) شكلك عجزت في دي كمان ومش هنلاحق عليك بروستاديل ..

- ويضحك بشكل جهوري فظ تشمئز منه زهرة وهي تبصق في الحوض وتغلق الباب ..

اشرف : .. واسمع .. عايزك تخلي رجالتك اللي بيقبضوا عشر اضعاف مرتبات الهيئة دول يشدوا حيلهم شويه ويركزوا على سقارة .. الشغل الثقيل كله طالع من هناك

- تنظف فمها وتغسل وجهها .. لحظات ويدخل اشرف يقذف بحبة دواء في فمه ويملا كوب ويشربها

زهرة : (منتبهاه بانزعاج) ايه اللي خدته ده ..؟

اشرف : (بينما يطوقها) .. الواد جمال مسميها الديزل ..

زهرة : (بضيق تحاول الافلات) هو ابنتك ده مش عايز يشيلني من دماغه ..

اشرف : .. الحق عليه اللي بيوجب معاكي ..

زهرة : .. ياسيدي مايوجب مع امه ..

اشرف : (نفس الضحكه) يانهار اسود دي تروح فيها (بينما يطوقها اكثر) بقولك الديزل ..

ثم متأملا جمالها بشهوة) .. انتي عارفه جوز جيهان مسميكي ايه .. الحورية .. عايز يجرب حظه

تاني .. فاكر هيلاقى منك اتنين .. قتلته مفيش غير زهرة واحده بس .. وانا اللي قطفتها ..

- وقد بدأ في نزع ملابسها وهي تتمتع بضيق بينما يغلق الباب يقدمه لنسمع صوتها من خلفه ..

زهرة : .. قتلتك مبحش كده .. (ويعلو صوتها) بس بقى (وكأنه يكتمه) مش عايزه ..

- لنسمع صرخات مكتومه وبعض الجلبه في الداخل ..

- دمج

٤٤ - القطار / نهار داخلي

زهرة : (بوجه ممتعض)

عمر : .. ايه رحتي فين ...

زهرة : .. ها ..

عمر : .. لو اعرف بس بتغطسي مني فين كل شويه ..

زهرة : .. مفيش انا معاك ..

عمر : (مداعبا) .. طب اربعه وعشرين في سبعة بكام ..؟

- الى ان نسمع عامل البوفيه ..

العامل : .. ١٦٠ يافندم ..

عمر : (بلا تردد) غلط .. (منتبها) هو ايه ده اللي ١٦٠ ..؟

العامل : .. الحساب .. حساب حضرتك ١٦٠ .. تلاته شاي وسندوتشين وازازة ميه .. عشان بنقل

الشفة ..

- له ثم لبعضهما وبيضحكان

- دمج

٤٥ - القطار / نهار داخلي

- الخلفية الموسيقية اغنية جمال الدنيا (من تليفون عمر)
- نرى من نافذة القطار جمال المناظر الطبيعية الخلابه للريف المصري ..
- وقد جلست زهرة تتابع المنظر الخارجي بوجه مشرق وعمر يتابعها بابتسامة حب
- نرى الرجل صاحب الكرسي في مكانه يتابعهما بابتسامة عريضة
- لحظات وتتحول ملامح زهرة وهي تذرف بعض الدمعات التي تمسحها باطراف اصابعها
- ينتبه لها عمر وهو يخفض الصوت ..

عمر : .. مالك ؟..

زهرة : .. شكل الغيطان فكرني بايام جميله ..

عمر : .. انتي من هنا ؟..

زهرة : .. بابا وماما كانوا م المحلة .. وانتقلنا المنصورة عشان شغل بابا واتولدت هناك .. (تتذكر بابتسامه) .. في بيتنا الجديد .. واول ما ادوني لبابا جت وقفته جنب الشباك .. عينه لمحت اول وردة بلدي ابتدت تنبت في الجنيهة .. (له) .. سماني زهرة ..

عمر : (تلمع عينه في عينها بابتسامه)

زهرة : (تبتسم بخجل ثم مسترسله) .. كنت دلوعة العيلة كلها .. مع ان كان فيه احفاد اكبر مني .. بس امي كان حملها عزيز وابويا كان الولد الوحيد على اخوات بنات .. عشت احلى خمس سنين ..

عمر : (يتابعها بحب)

زهرة : .. لحد ما ربنا كرمنا بعلي اخويا .. كان فرحة تانيه وسنين احلى .. كان ابني مش اخويا .. (تتحول ملامحها) .. لما بقى في ثانوي طلع معسكر شباب في مرسى مطروح .. وهما عند البحر

وصل هو وصاحبه لمنطقة صخور عاليه عشان ينطوا من فوقها ع الميه .. (بحزن) .. صاحبه

نزل سليم وهو اختل توازنه ووقع على صخرة ..

عمر : (أسفا)

زهرة : .. عشنا ايام صعبه قوي لحد ما قررنا ننزل نعيش في القاهرة .. قلنا يمكن الزحمه والحياة الجديده تلهينا .. (تتنفس الصعداء) .. لكن الظاهر ان اول كسرة قلب .. بتمرر طعم اي فرحه .. وتعدي السنين لحد ما يحصلوه .. (بالم) .. ووراهم عمر .. و .. وابتديت احس .. (بتهكم) انها مؤامرة م الكون عشان افضل دايم لوحدى ..

عمر : (متأثرا لاشعوريا يربت على يدها)

زهرة : (فتسحبها بهدوء وبدعابة) .. مش كان زمانك مريح دماغك م الوش ده كله ..

عمر : (بـود) .. ده انا نفسي اقوم اخذ الراجل بالحضن عشان وافق بيبدل مكانه معايا ..

زهرة : (بامتنان)

- الساعة تعلن العاشرة من منبه فى موبايل احدهم

- دمج

٤٦ - القطار / نهار داخلي

- نرى من النافذة يافطة محطة طنطا تمر بينما القطار في طريقه ..
- عمر يقلب في هاتفه حتى يستوقفه شئ فيبتسم .. ويخبر به زهرة الشارده في نافذتها ..

عمر : .. شفتي الابهل ده ..

زهرة : (تلتفت منتبهه) ها ..

عمر : .. مسجل رقم قياسي في رفع القواصي .. على جيرانه ومدرسته ومشاهير وظباط وقضاة ..

وعلى امه انها معرفتش تربيه .. وصحابه اللي هزارهم تقيل وخطيبته اللي بتتاخر على مواعيدها .. ده حتى الصحفي اللي سجل معاه لما ضحك رفع عليه قضية سخرية .. والله العظيم عالم فاضيه ..

زهرة : .. بالعكس .. هو ايه اهم من اننا نحاسب المستهترين بالتربية والوقت والاحترام ..

عمر : (مداعبا) هاش تاج .. زفت تنمية بشرية ..

زهرة : (تبتسم)

عمر : .. هو حد جايلك المحطة صحيح ولا تحبي اوصلك .. انا بجرش عربيتي جنب المحطة وانا مسافر ..

زهرة : (تتذكر بضيق) ... لا لا .. فيه حد جايلي ..

عمر : .. طب مش هتفتحي تليفونك تبلغيه اننا قربنا نوصل ..؟

زهرة : .. لما نبقى نوصل ..

عمر : (مترددا) طب .. ممكن نمرتك ..؟

زهرة : (بتحفظ)

- قطع

٤٧ - محطة قطار سيدى جابر / نهار خارجي

- ساعة المحطة تعلن الواحده ظهرا
- بعض الجلبيه الاعتياديه على رصيف المحطة ..
- يتوقف القطار وينزل الركاب من ابوابه المختلفه ..
- لحظات وينزل عمر تتبعه زهرة بتوجس شديد بينما تتمنى ان يتحرك القطار قبل ان تلمس قدماها الارض .. يمد لها عمر يده فتتردد قبل ان تستند عليها وتنزل ..
- يرتدي كل منهما نظارته بينما تتدثر زهرة في شالها الخفيف وكأنها تخفي نفسها ..
- يظهران في كاميرا المحطة وهما يسيران خطوات قبل ان تتوقف ..

عمر : (لها)

زهرة : .. انا هستنى هنا .. (بتردد) ه دور على .. كابينه اكلم اللي جاي لي وهستناه هنا ..

عمر : (مستوعبا انها لحظة الفراق)

زهرة : (له وكأنها تتوسله الا يرحل)

عمر : .. دلوقتي بس حسيت ان القطر كان لازم يفضل ماشي ..

زهرة : (له)

عمر : .. كلميني اول ما تفتحي تليفونك عشان اطمن عليكى ..

زهرة : (بوهن تومئ حسنا)

- ويتبادلان النظرات طويلا ..

عمر : .. اشوف وشك بخير ..

زهرة : (تبلع ريقها) .. مع السلامة ..

عمر : (يودعها بنظراته مختلفيا)

- تقل الناس لتشعر زهرة وكأنها وسط رياح بارده .. تتلفت بعينها فلا تراه ..
- تنزوي بأحد المقاعد تنظر للمشهد في توجس
- يمر الوقت وقد اختفى القطار من المشهد لتجد نفسها شبه وحيد على رصيف المحطة ..
- تتلفت من جديد حولها علها تراه ..
- لحظات من الحيره والخوف تملكها حتى تنتبه لصوت قطار اخر يأتي من بعيد ..
- ترفع رأسها اليه ببطئ تحديق به
- نظرات عينها توحى انها قد انتوت شيئا ما
- قطع متبادل بين زهرة الضعيفه الخائفه والقطار يقترب
- تقف بخطى مرتعشه متردده بينما تقترب من الرصيف
- وعند اللحظة الفارقه التي قررت فيها ان تقذف بنفسها امام القطار نرى يد تسحبها بقوة من ذراعها لنكتشف انها يد عمر الذي جذبها وضماها الى صدره متسارع الانفاس لتنهال في بكاء مرير
- تظهر صورتها من منظور كاميرا المحطة
- لحظات وتنتبه انها في احضانه فتبتعد فيمسكها من يدها باحكام مستفهما
- قطع

٤٨ - محطة سيدى جابر / نهار خارجى

- عمر ممسكا بيد زهرة المستسلمه له يسير بها خارجا من المحطة
- ينتظر لحظه قبل ان تقترب منهم سيارته يقودها شخص يتضح انه سايس جراج ..
- يتحرك عمر باتجاهها فور رؤيته .. يترجل الشخص ويعطيه المفتاح ويضع عمر بعض النقود في جيبه لينصرف ..
- يفتح عمر الباب الاخر لزهرة لتركب ويركب هو مكان السائق متحركا ..
- قطع

٤٩ - فوتومونتاج

- الخلفية الموسيقية اغنية اسكندرية لمصطفى قمر
- استعراض للشوارع والناس والكورنيش
- قطع

٥٠ - كورنيش اسكندرية / سيارة عمر / نهار خارجي

- الموسيقى مستمره والصوت يصدر من كاسيت السيارة
- زهرة شارده خارج الشباك
- عمر يقود امامه متديرا بينما يرمقها بنظراته من وقت لآخر
- يرن هاتفه .. يخفض الصوت ويرد ..

عمر : .. ايوه يا حبيبيتي .. اه خرجت خلاص .. هعدي بس ع المكتب اسيب لهم الورق اللي معايا

....

حاضر مش هتأخر.. ولو اتأخرت اتغدوا انتوا .. طيب طيب .. يلا سلام ..

زهرة : .. احنا رايجين فين ..؟

- قطع

٥١- كازينو الشاطبي / نهار خارجي

- عمر وزهرة على احدى الطاولات المقابله للبحر بينما يدخل عليهم الجرسون ..

الجرسون : .. صباح الخير يا عمر بيه ..

عمر : .. ازيك يافايز عامل ايه ..

الجرسون : .. بخير والله .. اوامر ..

عمر : .. واحد لمون بالنعناع وواحد قهوة ..

الجرسون : .. عنيا .. (وينصرف)

عمر : (متفحصا زهرة لحظات) .. انا سامعك ..

- بتوجس له ثم للبحر قبل ان تخرج من حقيبتها بطاقتها الشخصية تضعها امامه في هدوء ..

- يسحبها بهدوء يتفحصها الى ان يستوقفه شئ بصدمة ..

عمر : .. اشرف بركات ..؟

- قطع

٥٢ - فلاش باك / قهوة في حي قديم / ليل خارجي

- والد زهرة مع حجاب (الستيني) على القهوة يتحدثان ..

حجاب : (بصدمة) بتاع التلفزيون ..؟

الاب : .. تلفزيون ايه وراديو ايه يا حجاب ما تركز معايا ..

حجاب : .. والنبي البت دي طول عمرها مرزقه .. ووقعت عليه فين ده ..؟

الاب : .. لا وانت الصادق هو اللي وقع علينا ..

حجاب : .. ومالك بتقولها بقرف كده ليه ..؟

الاب : (متنهدا) .. حاسس اني بلم الشامي ع المغربي وهو ملوش غرض فيه ..

حجاب : .. شوف يا سامي ياخويا .. الغرض الوحيد اللي بيحكم في الاحوال دي هو المصلحة ..

ومصلحة بنتك في جوازه مقرشه زي دي ..

- دمج

٥٣- كازينو الشاطبي / نهار خارجي

زهرة : .. انا تخيلت انك عرفتني لما قلت لي انك عارف انا مين ..

عمر : .. انا كنت هقول حاجه هزار .. (مستوعبا) .. انتي بقى عارضه الازياء ولا الرسامه اللي
بيقولوا خدتيه من على مراته ..

زهرة : (بابتسامه مريره)

عمر : (منتبها) .. بس ازاي قتلتي ان ابو ابنك مات ..؟

زهرة : (تصمت)

- دمج

٥٤ - فلاش باك / فيلا زهرة / ليل داخلي

- زهرة وعمر ابنها العشريني في غرفة المعيشة يشاهدان فيلم my left foot في التلفزيون
- عمر مستلقيا برأسه في حجرها بينما تداعب خصلات شعره في اندماج ..

زهرة : .. يخرب بيته .. انا لو معرفش انه ممثل كنت افكرت انه حقيقي شكله كده ..

عمر : .. شفتي بقى بقولك فالجر .. ده حتـ...

- ليقاطعه دخول اشرف مقتضب الوجه ..

عمر : (مداعبا) ايه ياعم كفاره كل ده تليفون ده الفيلم قرب يخلص ..

اشرف : (جالسا بعدم اكتر اثار ولزهرة) .. ايه اللي حصل مع جيهان ..؟

زهرة : (تتغير ملامحها) .. اه ..

عمر : (معتدلا يحاول تهدئة الموقف) انا سمعت الحوار على فكرة كل اللي حصـ....

اشرف : (بجده مقاطعا) ملكش دعوة انت ..

عمر : (منحرجا ينظر لزهرة وينصرف)

- تنادي عليه زهرة وتتحرك لتتبعه فيجذبها اشرف من يدها ويجلسها ..

اشرف : .. انا اما ابقى بتكلم كلامي يخلص الاول ..

زهرة : .. خير ياخو الهانم ..

اشرف : .. ايه اللي حصل مع جيهان ..؟

زهرة : .. امال بفالك ساعة معاها ع التليفون بتقولوا ايه ..

اشرف : (بنبره) ايه اللي حصل مع جيهان ..؟

زهرة : (بضيق) الهانم اتقمصت لما رفضت اعمل خطوبة ابنها هنا ..

اشرف : .. وبتاخدي قرارات بخصوص البيت ده على اساس ايه ..؟

زهرة : (بحده) ده بيتي ..

اشرف : (باكثر حده) ده بيت اشرف بركات .. يعني بيت العيله ويخص كل اللي من ريحته ..

زهرة : .. يعني ايه .. عايشه كل السنين دي في دار مناسبات وانا معرفش؟ .. شارع عمومي والاسم بيتي؟

.. مليش فيه غير يافطه ع الباب مكتوب عليها فيلا زهرة ..؟

- وتتركه منصرفه فيقبضها من ذراعها وبهدوء مفتعل ..

اشرف : .. تتصلي بجيهان وتعذري لها ..

زهرة : (تحاول الافلات) مش هيحصل ..

اشرف : (بأمر) تتصلي بجيهان وتعذري لها.. وتبلغيها ان خطوبة فادي هتتعمل الخميس في معادها .. هنا ..

زهرة : (بقهر)

اشرف : .. وعقابا ليكي عشان بتتصرفي من دماغك تكاليف الحفلة كلها هتتخصم من مصروفك ..

- فتقلته بامتعاض وتنصرف ..

- قطع

٥٥ - فلاش باك / غرفة عمر ابن زهرة / ليل داخلي

- وعند الباب نرى زهرة تمسح دموعها الغزيرة وتغير ملامحها لتعابير مبتسمة ..
- تطرق الباب وتدخل لتجد عمر يقلب في هاتفه بوجه مقتضب مدخنا ..
- تتوجه تجلس بجانبه وهي تأخذ السجارة بلوم وتطفئها ..

زهرة : .. مش قلنا بلاش دي ..؟

عمر : (متأففا)

زهرة : .. الفولور وصلوا كام ..؟

عمر : .. احنا لامتى بقى هنستحمل القرف ده ..؟

زهرة : .. هي طريقته يعني جديده عليك ..؟

عمر : .. وطريقته دي بقى هنفضل مستحملها لامتى .. واشمعنى معانا احنا بس .. ميشوفوش يعني

بيعمل كده مع جمال وعلاء ..؟

زهرة : .. عمر يا حبيبي بابا.....

عمر : (مقاطعا بحده) اشرف بركات مش ابويا .. انا عمر هشام توفيق ..

- قطع

٥٦- كازينو الشاطبي / نهار خارجي

- عمر مستندا بكفيه المشبوكتين تحت ذقنه في كامل تركيزه يستمع ..

زهرة : (تمسح دموعها) .. كان دايفر في الغردقة .. كنت حامل في عمر وكنا المفروض هنروح نعيش معاه هناك بعد ما اولد .. وهو نازل يحضر الولادة عمل حادثة ع الطريق .. ومات ..
عمر : (بألم متابعا) ..

- قطع

٥٧- فلاش باك / غرفة عمر هشام / ليل داخلي

- نفس اليوم اشرف يقف خلف باب الغرفة المغلق يستمع لحديث زهرة وعمر ..

زهرة : .. اشرف اللي رباك ياعمر ..

عمر : .. محدش رباني غيرك .. واي مليم اتصرف عليا انا عارف استحملتي قصاده ايه ..

زهرة : (بانكسار)

عمر : .. يلا نمشي ياماما ..

زهرة : (متفاجاه بتدبر)

اشرف : (مقتضبا)

عمر : .. انا كبيرت واقدر ابقى مسئول عنك واعوضك عن كل اللي فات ..

زهرة : (له)

عمر : .. احنا خلاص مبقيناش محتاجين له .. انا محوش مبلغ كويس من شغلي معاه نقدر نبدأ بيه ..
نأجر شقة او ان شاء الله حتى نرجع بيت جدو .. وكلها سنتين واتخرج واخذك انتي وحنين ونسافر..

زهرة : (تتابعه)

عمر : .. ابو ادهم صاحبي قرر يفتح فرع للشركة في هولندا ووعدني اني هكون معاه .. ويمكن
كمان حوار هوليوود ده يظبط وتتغير كل حاجه واجيبك الدنيا كلها تحت رجلكي ..

زهرة : (في وجه صغيرها بينما تحتضنه)

- تنتاب اشرف لحظات شرود مقتضبا بينما يتذكر شيئا ..

- دمج

٥٨ - فلاش باك / فوتومونتاج

- اشرف وعمر العشريني في احدى الحفلات الرسمية مع بعض الاشخاص يعرفهم به بينما يطوقه بذراعه ويبتسمان ..
- اشرف وزهرة مع عمر في العاشرة على يخت فخم بينما عمر يرتدي اللايف جاكيت ويحملانه الاثنان ويقذفان به في الماء في لقطة مرحة
- عمر طفلا في الخامسة يغني في حفلة مدرسية وزهرة واشرف يتابعانه فرحين واشرف يصوره
- عمر طفلا في الخامسة يصرخ في الحديقة فيركض اليه اشرف ليكتشف انه اصيب في اصبعه من شوكة في ساق وردة بلدي ..

عمر : .. كنت جايبهالك ..

- فيحتضنه اشرف مطمئنا .. وصوت زهرة يعلق باكيا ..

ص زهرة : .. مش عارفه ازاي جاله قلب ياذيه .. ازاي الايد اللي في يوم م الايام طبطبت .. تبقى هي نفس الايد اللي قدرت تأذي ..

- دمج

٥٩ - فلاش باك / فيلا زهرة / نهار داخلي

- اشرف ينزل درجات السلم متوجها لباب الفيلا لنرى عمر العشريني يفتح الباب ويدخل فيفتعل اشرف عدم رؤيته ويكمل طريقه ..

عمر : .. صباح الخير ياابا ..

- يحاول عمر محادثته ولكنه يكمل طريقه الى ان يخرج ..

عمر : .. بابا .. بابا .. (يزفر)

- صوت زهرة يعلق بألم ..

ص زهرة : .. ازاي كلمة بابا اللي سمعها صافيه كده سنين .. محنتتش قلبه عليه ..

- دمج

٦٠ - فلاش باك / فيلا زهرة / ليل داخلي

- عمر نائما في غرفته يستيقظ على صوت عراقك بين اشرف وزهرة بينما يحتد صوتها
ويسمع صوت صفعه على الوجه فيفز من مكانه مسرعا الى غرفتها فيجد اشرف يستعد
لصفعها مجددا فيمسك كفه في الهواء بقوة وعنفوان الشباب متناسيا فارق السن ومكانة
الشخص امامه ..

عمر : .. اياك تمد ايدك عليها ثاني ..

اشرف : (مصدوما)

عمر : .. ولولا ان انت اللي مربييني وفي مقام ابويا كنت عرفت ارد عليك ..

زهرة : .. عمر ..

اشرف : (باقتضاب مفلتا يده)

- صوت زهرة معلقا مع نظرة اشرف ..

ص زهرة : .. بصته لعمر لهنتني عن فرحتي بابني الراجل .. اللي كبر وبقيت اقدر اتحامى فيه ..
اللي خفت عليه لحظتها م اللي ممكن واحد زي اشرف يعمله .. لكن في اسوء احلامي مكنتش اتخيل
اللي حصل ..

- قطع

٦١ - فلاش باك / تونة الجبل / ليل داخلي

- عمر هشام العشريني داخل المقبرة الشبه مظلمه يصور فيديو لنفسه وفي الخلفية البعيده نسمع اصوات بعض الاشخاص يتحدثون ..

عمر : .. وده منظر المقبرة من جوه .. بعدنا تقريبا عن المدخل مسافة عشرين او ثلاثين متر ..
الهوا طبعاً ابتدى يخف شويه والعفره زادت .. وهنا .. (مقتربا من فجوه شاهقة الارتفاع حالكة
الظلام) .. ده بقى افتك....

- الى ان نفاجئ بيد تدفع عمر في الفجوة فيصرخ بينما يسقط وتخرج وطاويط منها ..
- ولقطة لاشرف بالخارج يسمع الصرخه مقتضب الملامح بينما يقف صامدا مكانه ..
- اظلام

٦٢ - فلاش باك / فيلا زهرة / ليل داخلي

- زهرة قلقه تحاول الاتصال بأحدهم فتسمع رسالة ان الهاتف قد يكون مغلق او خارج النطاق
ثم تعاود الاتصال بأخر فلا يرد .. فتتصل بجيهان ..

زهرة : (بقلق) الو .. ابوه يا جيهان .. اشرف كلمك النهارده ..؟

جيهان : (بتعالي) .. طبعا ..

زهرة : .. امال مبيردش عليا ليه .. طب كلميه قوليله يتصل بيا ..

جيهان : .. والنبي يختي سيببه يركز في اللي هو فيه ولما يفضى هيبقى يكلمك ..

زهرة : (بقلق) انا عايزه اطمئن على ابني تليفونه مقفول ..

جيهان : (بتهكم) .. لا مانا عارفه انك عايزه تطمني ع المحروس مش عليه ..

زهرة : (بضيق) ماشي ماشي سلام ..

- تمر ساعة .. وحالة القلق تزداد وهي لا تتوقف عن محاولات الاتصال من وقت لآخر ..

- لحظات وتسمع صوت سيارة يقترب من المنزل فتخرج مهروله لتجد اشرف بمفرده يترجل
بوجه صامت من السيارة ..

زهرة : .. عمر فين ..؟

اشرف : (بوجه حزين مزقه البكاء)

زهرة : (تستوعب) عمر فين .. عمر ابني .. فين ..

اشرف : (بيكي)

زهرة : (متشبهه بملابسه تعيدها مرارا) عمر فين .. عمر ابني .. ابني فين.. ابني عمر.. ابني .. ابني
عمر..

اشرف : (يزداد بكأؤه)

زهرة : (بهستيريا) عملت ايه في ابني .. ابني فين (وكأنها تبحث عنه حولها وتلطم وجهها) .. يا
عمر..

- الى ان تتملكها حالة صراخ وهي تكرر النداء عليه لتسقط مغشيا عليها ..
- اظلام

٦٣- كازينو الشاطبي / نهار خارجي

- يرن موبائل عمر فينتبه له ويرد متأثرا يبلع ريقه ..

عمر : .. ايوه ياماما .. لا مفيش مناخيري سابت بس م الهوا .. اه ماانا معلش قدامي بتاع ساعة كده
كمان ولا حاجه .. ياستي فخري وصل المكتب والله وعايظنا .. لا لا ساعة بالكثير واكون عندك ..
سلام

- زهرة مشبكة الذراعين وقد شردت في البحر ..

عمر : .. بس دول كانوا قالوا انه غرق في الساحل ..

زهرة : .. الخبر طلع من مكتبه .. عشان ميفضحش الشغل اللي كان رايح يعمله هناك ..

عمر : .. وقالك ايه اللي حصل ..؟

زهرة : .. ان رجله انزحلت ووقع ..

عمر : (متابعا)

زهرة : .. وانهم غامروا بنزول دليل منهم عشان يوصل ل... (بغصه) جثته .. لكن لحد تسعين متر
مكتش ظهرت اي ارض .. فاضطروا يطلعوه عشان الضغط ونقص الاكسجين ..

عمر : (متألما)

زهرة : .. بعدها بفترة قدروا يوصلوا للي كانوا بينبشوا عليه .. قال وعشان يواسيني .. فهمني ان
موت ابني كان القربان اللي فتح لهم الباب .. خمسه مليون دولار .. اتودعوا في حسابي يومها ..

- دمج

٦٤ - فلاش باك / فيلا زهرة / ليل داخلي

- زهرة في غرفة المعيشة ترتدي فوق ملابسها قميص رجالي يخص عمر وتحتضن برواز صور له بينما تتابع على شاشة الموبايل فيديوهات مختلفة له وهي منفعلة معها دامعة العين تنهه كالاطفال بصوت ..
- لحظات وتتقدم احدى العاملات بطبق به بعض الاقراص وكوب من الماء تضعه على الطاولة

العامله : .. الدوا يا مدام ..

- فنتور ثائرة زهرة وهي تدفع الطاولة بما عليها بقدمها وتنصرف من المكان لغير وجهه وكأنها تائهه تبحث عن شئ الى ان تنتبه للبار بانفاس متسارعه وتعلق بصوتها ..

ص زهرة : .. مدرتش بنفسي الا وانا ماسكه الازايز كلها .. بشرب من كل واحده شويه ..

- دمج

٦٥- كازينو الشاطبي / نهار خارجي

زهرة : (مسترسله) .. مش عارفه كنت عايزه حاجه تلطشني ولا حاجه تموتني ..

عمر : (يتابعها بألم)

زهرة : .. رجعت دخلت في كومه ثاني لحد ما لحقوني منها .. وابتديت اشرب وانا حاسه ان ده اللي

هينسيني .. لحد ما من كتر الشرب حصلت لي تقرحات .. (وهي تملس على خدها) وجالي سرطان

.. واتأكدت انه مش راجع ثاني ..

- دمج

٦٦- فلاش باك / احد الصروح الفرعونية / نهار خارجي

- زهرة امام احد هذه الصروح الجليله ترتدي الاسود وتضع باقه من الورد امامها على

الارض وترفع كفيها امامها تتمم بالفاتحه باكيه ..

- اظلام

٦٧- كازينو الشاطبي / نهار خارجي

- عمر لزهرة باشفاق بينما يتنفس الصعداء ..
- يقطع الجرسون الصمت ..

الجرسون : .. تأمر بحاجه ثانيه ياعمر بيه ..؟

عمر : (لها)

زهرة : (تومي لا وتذهب بعينها بعيدا)

عمر : .. شويه يافايز .. (وينصرف الجرسون ثم لها) .. وبعدين يازهرة ..؟ .. ايه اللي حصل في اسوان ..؟

- فتضم نفسها بذراعيها تتذكر باستياء ..
- دمج

٦٨ - فلاش باك / فيلا اسوان / ليل داخلي

- بعد مرور سنة
- زهرة تقف بملابسها السوداء (التي ترتديها الان) في شرفة جناح النوم شارده مع الليل الخلاب ..
- لحظات ويظهر اشرف يطوقها من خصرها فتفزع وهي تلتفت له ..

اشرف : (بهدوء) ايه بقى مالحننا جايين نهدي اعصابنا اهوه ..

زهرة : .. سبني في حالي وانا اعصابي تهدي لوحدها ..

اشرف : .. اسيبك في حالك ..؟ (محاوولا تطويقها) امال احنا جايين هنا نعمل اي.....

زهرة : (تقاطععه بحده) يووووه ..

اشرف : (بهدوء مفتعل) .. وهفضل لامتى في النكد ده ..؟

زهرة : .. ابني هفضل حزينه عليه العمر كله ..

اشرف : (بنبره) يعني اتكتب عليا احزن جنبك العمر كله ..؟

زهرة : .. طلقني ياخي وريح نفسك وريحني ..

اشرف : (بهدوء مفزع) قلتك انا مبطلقش .. انا يا بدفن يا بتدفن ..

- قطع

٦٩ - فلاش باك / فوتومونتاج

- زهرة وأشرف في جولات نهاريه ليلية مع ضيوفهم الاجانب والمصريين .. والعديد من الافارقه المندمجين مع الرحلة وتبدو عليهم السعادة بشكل مبالغ ..
- نرى كيفين (اجنبي خمسيني) يختلس النظر الى زهرة من وقت لآخر ويتابعها ويقوم بتصويرها بكامرته في عدة لقطات وفي كل اماكن الزيارات ..
- جولة بالمنطاد مع لحظات الشروق ..
- في قرية نوبية تشتهر ببعض الصناعات يتجول الزوار وعند عامل وقف يلف بريمه في الارض راح اشرف يمسكها منه يقلده مضييفا عليها بعض الحركات ذات الايحاءات الجنسية ناظرا لزهرة التي انصرفت بعيدا بامتعاض مع ضحك باقي الموجودين ..
- في مقابر وادي الملوك خصصت لهم جولة ليليه بملابس سهرة .. الجميع ومنهم اشرف يمر مرور الكرام على ما يشاهد بينما زهرة تقف معجبه بأحد الجداريات وهي تتحسسها وافريقيه متينه بجوارها تعلق ..

الافريقيه : .. our ancient grandparents have always been admired by ..
everyone

- وتتركها منصرفه بينما تتابعها زهرة متعجبه باقتضاب ..
 - اشرف منجذب لـ لارا (زوجة كيفين الخمسينيه) والتي تعيش سن العشرينات بمجون واستهتار وضحكات عاليه وتبادل اشرف افعاله ..
 - حفلة صاحبه نهاريه على باخرة نيلية .. الجميع يستمتع بها ويرقص غير مكترث بسنه ولا مكانته ومنهم اشرف بينما نرى زهرة عند مقدمة الباخرة تقف مستمتعته بالهواء ومنظر النيل وهي تدخن ..
- (اليمر مركب عمر من منظوره في مشهد ٦)
- كيفين يقترب من زهرة يناولها كوب من مشروب روعي فتتردد قبل ان تأخذه منه بابتسامة مجامله

- سهرة ليلية فاخره في الصحراء .. طعام ومشروبات ورقص .. الا زهرة وهي تتابع رقص اشرف الذي يتوجه يجلس بجانبها متسارع الانفاس ..

اشرف : .. هتفضلي قاعده كده زي خالتي ..؟

زهرة : (له ثم بعدم اكتر اثار تشرب من كوب العصير في يدها)

اشرف : .. ده لارا اللي افكرت عندها ٢٠ سنة طلعت اكبر منك ..

زهرة : (بعدم اكتر اثار ايضا بينما تسأله مؤشره برأسها باتجاه الافريقيه التي ترقص غير مكرثه بحجمها) هي الوليه دي مجنونه ..؟

اشرف : .. لا هم اللي رقصهم كده ..

زهرة : .. انا مش بتكلم ع الرقص ..

اشرف : .. امال ايه ..؟

زهرة : .. واحنا في المقبرة تحت بتقولي ان اجدادهم مثار اعجاب للعالم كله .. اجداد مين ..؟

اشرف : .. مش بيقولك ان كل ده طلع بتاعهم ..

زهرة : .. بتاعهم منين بقى ان شاء الله ..؟ (بتهكم) .. اليهود اتنازلوا لهم عنه ..؟

- ليقطع كيفين حوارهما وهو يطلب نخب في صحة اشرف ..

كيفين : .. let everyone greet king ashraf barakat ..

الجميع : (يحييه)

اشرف : (صانحا) .. كينج الصحراوي ..

- .. ويضحكون الا زهرة يتابعها كيفين ..

- دمج

٧٠- فلاش باك / فيلا أسوان / ليل داخلي

- نفس اليوم
- اشرف وزهرة يصعدان السلم ويحاول امتلاك خصرها وضمها اليه فتتمنع بضيق .. يحاول مرة اخرى مبتسما بمكر فتحاول الابتعاد عنه وتسرع الخطى .. فيزفر بضيق ..

- قطع

٧١- فلاش باك / فيلا اسوان / ليل داخلي

- يدخلان غرفة النوم فتتوجه زهرة من فورها الى السرير تمدد جسدها في وضع الجلوس ..
- تشعل سيجارتها ومع اول سحابة دخان تشعر بالهدوء وهي تزفر الهواء ..
- اشرف يقترب نحوها بنظرات خبيثه .. وعند اخر السرير يمسك بقدمها فتضمهما نحوها فيجذبهم مجددا بهدوء ونظرة ثابتة فتستسلم بتوجس ..
- يقربهما لجسده ويخلع نعلها ويبدأ في تدليك قدمها واصابعها وهي تتابعه ..
- تمر لحظات من تبادل النظرات ..

اشرف : .. انا عارف ايه اللي هيغير مودك ..

زهرة : (تتابعه)

اشرف : .. احنا فعلا مرينا بفترة صعبة قوي ومحتاجين حاجه جديده تخرجنا م الحالة دي ..

زهرة : (تتابعه)

اشرف : .. كيفين بلغني صحيح ان الحاجه اترتب خروجها خلاص ومسافر كمان يومين يستلمها بنفسه ..

زهرة : (تتابعه)

اشرف : .. وكان بيفكر يعني قبل ما يسافر نقضي اليومين دول مع بعض احنا الاربعه ..

زهرة : (تتابع)

اشرف : (لحظات بينما يسحب السيجاره من يدها ليدخنها) .. لذيذه لارا ..

زهرة : (تتابع بتوجس)

اشرف : (مفاجأ) .. شكلها شقيه قوي ع السرير ..

زهرة : (تسحب قدميها بفرع)

اشرف : (بثبات وقح) .. انتي مش جسمك شايل مني .. خلاص .. جربي جسم تاني ..

- قطع

٧٢- الكازينو / نهار خارجي

- عمر مستمعا بامتعاض ..

- قطع

٧٣- فلاش باك / فيلا اسوان / ليل داخلي

- زهرة تتحرك نحوه في صدمة جمدت ملامحها ولحظات ترمقه بنظراتها ..

زهرة : .. كل يوم بتأكد اني رحمت العيال دي من ان يبقى لهم اب زيك ..

اشرف : (مستوعبا باستفهام)

زهرة : .. انا حملت ثلاث مرات ..

اشرف : (تتلون ملامحه)

زهرة : (بامتعاض) .. ومع كل مرة كنت بقرف منك كنت بنزله ..

اشرف : (مستوعبا بصدمه)

زهرة : .. ولما الادوية فشلت انها تمنع الحمل ... شلت الرحم ..

اشرف : (لها طويلا بالم ثم بنبرة تشفي) ... وانا اقول قتلته ازاي هو وابوه بدم بارد ..

زهرة : (تتشبث في ملابسه بفرع)

اشرف : .. اتاري موتهم مزودش غير المسافة اللي بينا ..

- لتفقد قدره على النطق حتى تلمح جراب المسدس داخل ملابسه ودون تردد تخرجه وتصوبه

في حالة انهيار باتجاهه .. وقبل ان ياخذ اي رد فعل تطلق رصاصه تطرحه ارضا دون حركة ..

- تفلت المسدس من يدها بفرع وهي تنزوي بعيدا عن احد الجدران تكتم انفاسها بقوة ..

- بعيون زائغه مضطربة الانفاس تتسبب عرقا تفكر سريعا

- تتوجه للمسدس تحمله وتنظفه بطرف ملابسه وهي تنتفض مزعوره بشفاه يكسوها البياض

ثم تخطف حقيبتها وحذاءها وتخرج من المكان ..

- دمج

٧٤- فلاش باك / ممر شبه مظلم / ليل خارجي

- في ممر شبه مظلم الا من بعض الاضواء نرى زهرة تسرع الخطا مذعوره ..
- دمج

٧٥- الكازينو / نهار خارجي

- زهرة دامعة العينين وعمر قابضا على يدها يطمئنهما .. تنتبه لتسحب يدها ..

عمر : .. لكن صوت ضرب النار والشغالين اللي كانوا في الفيلا ..؟

زهرة : .. مكنش فيه حد غيرنا .. كان مفضي البيت عشان القذاره اللي كان ناوي يعملها ..

عمر : (متديرا) .. احنا لازم دلوقتي نعرف ايه اللي بيحصل هناك .. (يزفر متديرا بينما يتصل بأحدهم)

زهرة : .. هتعمل ايه ..؟

عمر : (موشرا لها ان تصمت ويرد بدر) .. اه يا بيدو .. ازيك يا حبيبي الله يسلمك .. معلىش والله اتخطفت م المحطة للمكتب عدل سامحني .. تسلم لي يا حبيبي .. ايه .. بقولك يا بدر ..

زهرة : (له بتوتر)

عمر : .. هي ايه صحيح الحكاية اللي حصلت عندكوا امبارح دي ..؟

ص بدر : .. حكاية ايه ..؟

عمر : .. بيقولوا ان المذيع ده اسمه ايه مراته قفشته مع واحده كده في فيلا خاصة وكان فيه هيصه كبيره وبيقولوا اتقتل باين .. اه .. طب ما تعس لي كده ع الحكاية دي لاحسن تهم الرئيس بتاعنا .. يعني .. داخل انتخابات مجلس المدينة بقى وعايز اسمه يفرقع جنب اي حدوته من دول ..

ص بدر : .. من عنيا .. اديني بس قيمة يومين ارجع من عند خوالي في دشنا وارد عليك ..

عمر : .. لا يومين ايه ده حوار مستعجل .. معلش والنبي يابدر تعس لي عليه وهكلمك بالليل ..
ماشى .. (منتبها) بس اسمع .. انت يابدر .. انت .. مش منك لحد لحدود .. خليها في السكرته وانا
هابقى افهمك .. ماشى يا حبيبي ما اتحرمش منك .. سلام ..

زهرة : .. مين ده ..؟

عمر : .. ده بدر صاحبي .. واد جدع قوي من اسوان هو اللي هيجيب لنا قرار اللي بيحصل هناك ..
(بينما يقلب لحظات في الهاتف) .. ومفيش حتى اى اخبار ع الننت .. اسمه في السيرش مش مطلع
غير اخبار قديمه ..

زهرة : (تزفر بضيق ووهن وهي تستند بوجهها على كفيها)

عمر : (لها باشفاق متدبرا)

- قطع

٧٦ - الكازينو / نهار خارجي

- عمر بمفرده على الطاولة يتحدث في الهاتف مع صبري السمسار بينما نسمع صوته ..

عمر : .. بس عايزها جبي يا صبره من غير ورق ولا بطايق ..

ص صبري : .. على عيني والله يا عمر بيه بس المباحث شاده ما انت عارف ..

عمر : .. يا صبري استجدع مرة واعمل معايا الانسانية انت هتغلب ..

زهرة : (تعود للطاولة وتجلس)

ص صبري : .. وغلاوتك يا عمر بيه لو كان ينفع ما كنت اتاخر .. بس الواد رمضان لسه مشدود من

اسبوع في حوار زي ده وانت ميرضكش اذيتي ..

عمر : (يزفر)

ص صبري : .. عموما برضه اديني رعايه واراد عليك ..

عمر : .. ماشي .. سلام ..

زهرة : .. هو بدر ده ..؟

عمر : .. لا ده صبري اللي هيشوف لنا شقة تقعد فيها ..

زهرة : (بتدبر وقلق)

عمر : .. متقلقيش انا هتصرف .. (بابتسامة مطمئنا) .. تحبي نقوم نتمشى شويه ...

- دمج

٧٨- شاطئ البحر / نهار خارجي

- زهرة وعمر يسيران بمحاذاة الشاطئ الرملي .. هي تتنفس من كل قلبها وهو يتابعها براحة..
- ويمر بعض الوقت قبل ان يرن هاتفه ليُرد فنسمع صوت صبري ..

ص صبري : .. سامحني والله ياباشا مقفله ضبه ومفتاح ..

عمر : .. طب ماتشوف لي حاجه عند ميسي ..

ص صبري : .. ما ده اللي كنت بكلمه والله بس هما نفس البوقين ..

عمر : (بقلة حيله) .. ماشي يا صبري .. مع السلامة ..

ص صبري : .. هي لمين ياباشا ..؟

عمر : .. مع السلامة يا صبري ..

- ويغلق الخط متدبرا وهما يتبادلان النظرات ..

- قطع

٧٩- عمارة على كورنيش البحر / نهار خارجي

- في شارع جانبي وامام بوابة العمارة تتوقف سيارة عمر بجانبه زهرة ..
- يطفئ المحرك ويتبادلان النظرات ..

عمر : (متحفذا بسخريه) .. لو منزلتش بعد عشر دقائق بلغي البوليس ..

زهرة : .. انا مش موافقه ع اللي عايز تعمله ده ..

عمر : .. مقدمناش حل ثاني ..

زهرة : (له بامتنان)

عمر : (يعطيها هاتفها) .. خليه معاكي .. نمرتي متسجله برقم واحد .. مش هتاخر عليك ..

- له بينما تأخذ الهاتف .. بيتسم منصرفا لداخل العمارة ..

- يقابله مجاور البواب (خمسيني هزيل بقميص وبنطلون)

عمر : .. ازيك يا مجاور ..

مجاور : .. تسلم ياباشا حمدالله ع السلامة ..

عمر : .. الله يسلمك ..

مجاور : .. مش هتجرش العربية ..؟

عمر : .. مش شايف فيها بني آدمين ..؟ .. عينك عليها لحد ما انزل ..

مجاور : (يضرب بعينه خارجا) ع الاستاذ ..؟

عمر : (على رقبتة وهو يستقل الاسانسير) ع العربية ..

- وداخل الاسانسير يواجه المرأة متدبرا بنفس عميق ..
- يقف الاسانسير ويخرج متوجها ل احد ابواب الشقق يسمى قبل ان يفتح ويدخل ..
- لتخرج من الداخل والدته بداره (ستينية محتفظه بهيئتها ترتدي ترينج) ..

بداره : (بينما تطوقه بحرارة) لا ياشيخ ما لسه بدري ..

عمر : (يحتضنها) غصب عني والله ..

بداره : .. شنطتك فين ..؟

عمر : .. تحت مع زهرة ..

بداره : (ردة حسن مصطفى) .. مين ..؟

- قطع

٨٠ - سيارة عمر / نهار خارجي

- زهرة شارده بقلق ولحظات قبل ان تقرر فتح باب السيارة ..
- قطع

٨١ - شقة عمر / الصلاة / نهار داخلي

- بداره تجلس في صمت تنتظر لعمر الجالس امامها ..

عمر : (مسترسلا) وهما يومين ويمكن اقل .. هتفضل في الاوضه ومش هتحتسي بيها خالص ..

بداره : (لحظه وهي تربت على خده) .. يا حبيبي .. انت جعان لدرجة انك ابتديت تهلوس ..؟ .. حالا ياقلب امك اقوم اغرفلك (وتهم بالانصراف)

عمر : (فيجلسها) ياستي اغرفلك ايه بس بطلي هزار ..

بداره : .. يا حبيبي امال اسيبك تهزر لوحك (وتهم بالانصراف)

عمر : (يمنعها بحده) ياماما اقعدني بقى الله ..

بداره : (تقاطععه باكثر حده) اقعد ايه يا ابن الهبله .. مين دي ياواد اللي عايز تدخلها البيت وتقعدها وسطينا ؟

(تنتبه) .. نهار اسود لتكون غلظت معاها وحملتها وجايبهالي هنا تكن من اهلها وداخل عليا بالفيلم ده ..؟

عمر : (متعجبا) انا برضه اللي بتاع افلام ..؟

بداره : .. امال يعني ايه موكله .. والاستاذ موصي عليها .. ومينفعش تقعد في حته لوحدها

عمر : .. يا حبيبي قتلتك مطلوبه ..

بداره : (بانفعال) احيه وعايز تدخلها عليا انا واختك ..؟

عمر : .. ياستي مطلوبه مدني مش جنائي .. جوزها بيدور عليها عشان مشاكل بينهم ..

بداره : .. مشاكل ايه ..؟

عمر : .. ياستي مشاكل وخلص ..

بداره : .. هو ايه اللي مشاكل وخلص مش يمكن حراميه ولا قتالة قتلا ..؟

عمر : (منفعلا) وانا هدخل عليكموا الاشكال دي برضه ..؟

- حتى يفتح باب الشقة وتدخل امنية (اخته العشرينيه) تحمل حقيبة لاب توب مكتظه ..

امنية : .. ايه يا جدعان فيه ايه صوتكوا جايب لحد بره .. (لعمر) حمدالله ع السلامة يامتر .. ايه يالم
عمر بتزعقي ليه ..؟

بداره : .. بلا ام عمر بلا ام زفت ..

امنية : (تعمره) ومين الحته اللي في العربية دي ..؟

بداره : (بانشكاح مصطنع) .. دي زهرة ..

- قطع

٨٢- مدخل العمارة / نهار خارجي

- وفي السيارة نرى زهرة وقد غفت برأسها من التعب ..

- عمر يخرج من باب العمارة وفور رؤيته لها غافيه يقترب من السيارة بهدوء يتأمل وجهها

مبتسما

- قطع

٨٣ - شقة عمر / غروب داخلي

- عمر يفتح باب الشقة مرحبا بزهرة التي وقفت على بعد خطوات ..
- تقترب شيئاً فشيئاً بخجل وترقب حتى تصبح في مواجهة الباب
- نرى أمنية بالقرب من المدخل تتفحص هيئتها ثم تبتسم لها بهدوء مرحبه ..
- يعيد عمر ترحيبه بينما يسبقها فتدخل ..
- ومن البلكونة العريضة في واجهة الشقة نرى بداره تخرج منها خلفها منظر البحر والسماء
- بوجه صامت تتفحص زهرة التي ظلت تبادلها النظرات وتبلغ ريقها في توجس ..
- نسمع صوت الاذان من الخارج ..
- اظلام

٨٤ - شقة عمر / المطبخ / ليل داخلي

- بدارة على طاولة صغيرة تدخن متدبره بينما أمنية تجهز الطعام في الاطباق ..

امنية : .. فكي بقى يا بداره الست طلع شكلها بنت ناس اهوه ..

بداره : .. والناس دول فين بقى يلما عيالهم ؟..

امنية : .. ياسستي مايمكن مقطوعه من شجرة وملهاش حد ..

بداره : .. واخوكي بقى الاهبل اللي بيلم المقاطيع ها ..؟

امنية : .. لما انتي قلقانه كده وافقتي ليه ..؟

بداره : .. مش عشان اعرف اخوكي مورط نفسه في ايه ..

- قطع

٨٥ - شقة عمر / الصالة / ليل داخلي

- امنية تضع الاطباق على السفرة وتلتف لتلتقي بزهرة تجفف يدها فيبتسمان لبعضهما ..
- عمر وقد خلع الجاكيت يتحدث بالموبايل في البلكونه ..
- صوت زحمة الكورنيش مسموع في الخلفية بجانب صوت التلفزيون على فقرة اعلانية ..
- ولحظات قبل ان تدخل عليه زهرة فينتبه وهو ينهي المكالمة مستشرا .. ومبتسما ..

عمر : .. متخضيش من بداره ..

زهرة : .. كنت هتخض لو عملت غير كده ..

عمر : .. عموما هم حبة قلق هيروحوا مع الوقت ..

زهرة : (بابتسامه) وقت ايه بس .. هو انا هكمل بقيت حياتي هنا ولا ايه ..؟

عمر : (لها) .. مين عارف ..

زهرة : (بنظرة)

عمر : .. قصدي يعني يعجبك جو اسكندرية (وفي عينها) ومتقدريش تسيبيه ..

- تلحظهما بداره من بداية الصالة بنظره ثاقبه ..

زهرة : (تعطيه هاتفه) .. تليفونك ..

عمر : .. خليه معاكي .. مينفعش تفضلي من غير تليفون ..

زهرة : .. ليكون عليه شغلك ..

عمر : (مؤشرا به) بتاع الشغل معايا ..

- ويبتسم وتخرج بامتنان الى ان نفاجأ ببداره وقد قفزت بينهما على السور تنادي ..

بداره : .. يا مجاور .. هاتلي كيس ملح م البقال ..

عمر : (بغيط) .. بتندي على مجاور م العاشر ..؟ .. متكلميه ف الانتركم ..

زهرة : (منحرجه)

عمر : .. وملح ايه اللي عيزاه هو الاكل مش خالص ..؟

بداره : (بتدارك) .. واحنا مش هناكل ملح تاني ..؟

عمر : (يحتضنها خارجا بابتسامه صفراء) لا طبعا امال الضغط يجيلنا منين .. ياسلام .. عنيا ليكي

يام عمر .. ده انا انزل اجيبهولك بنفسي من ملاحه بورسعيد ..

بداره : (تهمس بنبره) .. مين دي ياولا ..

عمر : .. تعالي بس هفهمك ..

- دمج

٨٦ - شقة عمر / الصلاة / ليل داخلي

- التلفزيون في الخلفية يذيع شارة قناة ماسبيرو زمان ..
- الجميع يأكل ماعدا زهرة تمضع لقمتهما يبطن ..
- بداره وامنية يتابعانها بينما عمر يتابعهما وكأنه يرد نظراتهما عنها ..
- لحظات ..

بداره : (تباغتها) وانتي منين بقى يا مدام زهرة ..؟

زهرة : (لعمر يطمئننها ثم لها) .. م المنيا ..

بداره : .. ودي بلدك ولا بلد جوزك ..؟

زهرة : (له ثم لها) .. احنا الاتنين ..

بداره : .. غريبه شكلك مش من هناك ..

عمر : .. وهم بيبقى شكلهم ازاي .. ما بني ادمين زينا ..

بداره : .. والوالد بقى...

عمر : (مقاطعا) الله يرحمه .. (لها) الله يرحمه ويرحمني ويرحمنا كلنا ..

بداره : (لامنية)

عمر : (يغير الموضوع) .. خالتي صحيح عامله ايه ..؟

بداره : .. هتتشل من خلفتها السوده ..

عمر : (بعينيه ان تنتبه لكلامها) ليه ايه اللي حصل ..؟

بداره : .. الست ساره مش مبطله عس ورا جوزها لحد خلاص ما بقت مصدقه انه متجوز عليها ..

عمر : .. طب ماتروح الاحوال تطلع قسيمة باسمه وهي تعرف ..

بداره : .. وهو اهل يعني ماتلاقيه واخذ احتياطه ..

عمر : .. الاحتياط الوحيد انه يكون متجوز عرفي .. غير كده ميقدرش .. دفتر المأذون بقى بيتسلم في المحكمة وكل بياناته بتنزل اوتوماتيك ع الكمبيوتر ..

بداره : .. طب ما تبقى تخطف رجلك تشوف لها الحكاية دي ..

عمر : .. ياستي انا فاضي للهبل ده ..

بداره : .. اه لأ انت فاضي لهبل تاني ..

عمر : (لها)

زهرة : (وهي تقوم بابتسامه مجامله) متشكره قوي ع الغدا تسلم ايدك ..

عمر : (لبداره ثم لها) مكلتيش حاجه ..

زهرة : .. معلش اصلي مبتعشاش .. عن اذنكوا بس هدخل الحمام .. (وتنصرف)

بداره : (لامنية بتهكم خافت) .. ابقى فكريني يابت نعمل بكره كشك صعيدي ..

امنية : .. مش كده بقى يا ماما ..

عمر : (تاركا طعامه وبنظره) .. ودي بقى هسيبهالك ازاي وانزل ..؟

بداره : .. متسبهاش يا حبيبي ابقى خدتها في ايدك ..

عمر : (الحظات) .. لا مش هاخذها في ايدي .. وهتقعد هنا معززه مكرمه من غير ما حد يسمعها كلمة ..

بداره : (له)

عمر : .. ماما .. الست دي بنت ناس .. قوي .. وف مشكلة سوده مايعلم بيها الا ربنا .. ولحد ما تتحل مطلبتش منك غير يومين تقدهم معانا .. فيا تستقبلها بما يرضي الله .. يا هعرف الاقيلها مكان تاني تقعد فيه معززه مكرمه حتى لو في الشارع وانا اللي احرسها بنفسي ..

- زهرة امام مرأة الحمام وكأنها سمعت كلامه تنتظر براحة مستشرحه ثم شارده بوجه صامت

..

- دمج

٨٧- فلاش باك / فيلا زهرة / غرفة النوم / ليل داخلي

- زهرة الثلاثينية تتحدث بانفعال مع اشرف الذي انشغل في تمشيط شعره امام مرآة الحمام مرتديا الروب الحريري المفتوح على جسد نصف عاري ..

زهرة : .. وازاي تسمح لها تتهمني بحاجه حقيرة زي دي من غير ما ترد غيبتني وتهزءها ؟..

اشرف : (منشغلا)

زهرة : .. وفردة حلق ايه دي اللي هسرقها منها ..

اشرف : (يخرج من الحمام)

زهرة : .. هي موصلهاش انك طلبتني ببوكيه الماظ ؟..

اشرف : (بعدم اكتر اث يحاول تطويقها) ماخلاص بقى يا الماظ انت هتضيعي الليلة في الهيافه دي ..

زهرة : (تحاول التملص بانفعال) هيافه ان مراتك يتقال عليها حرامية وزباله وانت تسكت ..؟

اشرف : (يحاول) هي قالتلك وانتى قتلتها خلصنا بقى ..

زهرة : (بحده) وانت فين عشان تدافع عني ..

اشرف : (يحاول بشدة) انا مش عايز ادافع .. انا عايز اهاجم ..

- ويحملها بالقوة ويرتمي بها على السرير وهي تصرخ باعتراض ..

- اظلام

٨٨- شقة عمر / ليل داخلي

- زهرة وعمر بغرفته والباب مفتوح وهما على مرأى من امنية وبقاره في الصالة ..
- صوت التلفزيون في الخلفية يذيع فيلم ابيض واسود ..
- عمر يجمع بعض اغراضه من الغرفة بينما تجلس زهرة على طرف السرير يتحدثان ..
- بقاره وامنية تحتسيان الشاي .. بقاره تدخن وبعد لحظات ترقب وململه تنادي عليه .. عمر ..
- فينتبه بينما يخرج من الغرفة مبتسما ويغلق الباب واضعا اغراضه جانبا ويجلس ملتصقا بها وياخذ السجارة منها مقلدا يوسف خوري ..

عمر : .. عيون عمر .. نن قلب عمر ... (ويسترسل)

بقاره : (بنظرة متفحصه ثم بسماجه) العروسة عجبته الاوضه ولا تحب نغيرها لها ..؟

عمر : (يقفها) لأ العروسة عجبته الاوضه وطايره م الفرحة .. (لامنية) والنبي يابله امنية تشوفي

للعروسة غيار من عندك ..

امنية : (بخشونه) انا مبيدش هدومي لحد ..

عمر : .. طلعيها اي حاجة من جهازك يابت ..

امنية : .. ليه سبيل حسن ياقوت ..؟

- قطع

٨٩ - غرفة عمر + الصالة / ليل داخلي

- الساعة تخطت الثانية عشر
- زهرة في ملابس النوم على السرير في وضع القرفصاء تطالع السماء من الشباك شارد
- صوت التلفاز في الخلفية البعيدة يذيع فيلم اجنبي ..
- تنظر باتجاه عقب الباب لنرى اضاءة الصالة بالخارج ..
- عمر في الصالة بملابس النوم يفترش الاريكه مدخنا يقرأ كتاب لتوفيق الحكيم ..
- ينظر بعينه في اتجاه عقب باب الغرفة ليرى نور ضعيف ..
- يتردد لحظه قبل ان يتصل بها .. لنسمع صوتها ..
- قطع متبادل ..

زهرة : .. الو ..

عمر : .. صحبتك ..؟

زهرة : .. مش عارفه انام اصلا ..

عمر : (مازحا) .. م اللي مبيعرفوش يناموا الا على سرايرهم ولا ايه ..؟

زهرة : .. انا من كتر السراير اللي غيرتها بقيت احط دماغي على اي مخده انام .. ده غير ان البيت هنا فيه حالة م السكون تخليني ارواح في سابع نومه .. (تزفر) انا اللي مش قادره انام ..

عمر : .. احكيالك حدوته ..؟

زهرة : (بسخرية) حدوته اكثر م اللي انا فيه ده .. مقولتليش صحيح .. مين الولد الي صورته ع التسريحه دي ..؟

عمر : .. ده كريم ابني ..

زهرة : (تصمت)

عمر : .. بس هو اكبر م الصورة دلوقتي ببيجي اربع سنين ..

زهرة : .. ربنا يخليهولك .. امال هو فين ..؟

عمر : .. عايش في الامارات مع مامته وجوزها ..

زهرة : (تصمت)

عمر : (بمكر) .. مش هتسأليني اطلقنا ليه ..؟

زهرة : .. اكيد عشان كانت وحشه وانت اللي كويس ..

عمر : .. وبتقولها بتريقه كده ليه .. مش يمكن هي دي الحقيقة ..؟

زهرة : .. واكيد برضه الحقيقة بالنسبة لها .. محدش فيكوا هيطلع نفسه وحش ..

عمر : .. او احنا الاتنين كويسين بس ظروف الجوازه المخبطه هي السبب ..

زهرة : .. ملخبطه ليه ..؟

عمر : .. انا اصلي اتعرفت عليها .. في .. مصحة لعلاج الادمان ..

زهرة : .. هي كانت مدمنه ..؟

عمر : (لحظه) .. انا اللي كنت بتعالج ..

زهرة : (تصمت)

عمر : .. هي كانت في امتياز طب وبتتمرن هناك .. كنت وقتها لسه متخرج بقالي كام سنة والدنيا

ملطشه معايا في الشغل والحب والخيبه دي كلها .. بس .. اتلميت بقى ع الشله دي اللي مبتسبش

الواحد الا وهو خلصان خالص .. بداره بقى جمدت قلبها وحاولت تحبسني في اوضتي وتجرب معايا

خطة العلاج المنزلي .. بس لما قلبتلهم البيت مورستان اضطرت توديني المصحه .. كانت هي مع

الدكتور اللي استلم حالتي .. مش عارف الموضوع حصل ازاي ولا مين اللي ابتداه .. لكن اللي

حصل اني بعد ماخرجت بشهرين طلبت ايدها ووافقت .. اتخطبنا شويه وبعدها اتجوزنا .. وشويه

وجه كريم .. ومشاكل بقى لحد ما اطلقنا بعدها بثلاث سنين .. (متهكما) وكانت هذه نهاية فرقة

عكاشة المسرحية

زهرة : (صامته)

عمر : .. ايه ..

زهرة : .. كنت بتحبها ..؟

عمر : .. كنت بحترمها ومقدر اللي عملته معايا ..

زهرة : .. والحب ايه غير احترام وتقدير ..؟

عمر : (مبتسما) .. شكلك محبتيش قبل كده ..

زهرة : (تنصت)

عمر : .. الحب ده حدوته تانيه خالص .. عامل زي ساعة الرمل .. بيملأ القلب من ناحيه ويفضي
المخ م الناحيه التانيه .. بيخلي البني ادم زي المختلين .. لا عارف بيقول ايه ولا بيعمل ايه ولا فين
ولا امتى .. الزمن بيقف والحواجز بتتكسر .. وميقاش فيه اعتبار لاي حاجه غير للمشاعر اللي بينك
وبين حبيبك

زهرة : (تنصت)

عمر : (ساخرا) ايه .. بقول كلام عميق ولا عبيط ..؟

زهرة : .. بتقول كلام طول عمري مقتنعه بيه ..

عمر : (بمكر) .. وده اللي كان بينك وبين هشام ..؟

زهرة : .. هشام كان ابن عمتي .. وابو عمر .. وكان بيحبني قوي ..

عمر : .. وانتى ..؟

زهرة : (لحظه) .. الوقت اتاخر و عنيا ابتدت تغمض ..

عمر : (مبتسما بهدوء)

زهرة : .. وانت كمان لازم تنام .. تصبح على خير ..

عمر : .. زهرة ..

زهرة : .. نعم ..

عمر : (لحظه) .. ابقى اظفي المنبه اللي في التليفون عشان ميقلقكيش ..

زهرة : .. حاضر ..

عمر : .. زهرة ..

زهرة : (تصمت)

عمر : .. وابقى اعمليه صامت عشان لو حد اتصل وانتي نايمه ..

زهرة : .. حاضر ..

عمر : .. زهرة ..

زهرة : .. تصبح على خير يا عمر..

عمر : .. وانتي من اهله .. منتسيش تقفلي الشباك وتتغطي كويس .. الدنيا هنا رطوبة والحيطان بتبقى ساقعه بالليل ..

زهرة : .. حاضر ..

عمر : .. تصبحي على خير ..

زهرة : .. وانتي من اهله ..

- وتتهدد بينما تغلق الخط وتضع التليفون جانبا بهدوء متلحفه بغطاءها وهي تلقي نظره اخيره
- على السماء قبل ان تغلق عينها ..
- اظلام

٩٠- حلم / فندق اسوان + المغاره / ليل داخلي

- اشرف سائحا في دماءه ملقى على الارض في موضعه يفتح عينه فجأة ويهم واقفا بقوه يسير بينما الدماء تقطر منه
- يفتح باب غرفة اخرى لنرى المغاره الشبه مظلمه التي مات بها عمر
- عمر في سن الرابعه يتوسط العابه الصغيره التي يلهو بها في منتهى السعادة ليقترب منه اشرف يحمله ويسير به في اتجاه بير المغاره وعمر ينادي بحنو على زهرة .. ماما ..
- زهرة في سن الثلاثينات تعزف على بيانو داخل المغاره في فستان خلاب وفور سماعها لنداءات صغيرها تهب من مكانها لتفاجأ ب جيهان على هيئة حيه تمنعها من الخروج من محيط البيانو بحركتها وفحيحها
- اشرف يتحرك به نحو البئر وعمر الصغير ينادي وزهرة تتقدم وجيهان تمنعها
- تتتابع اللقطات حتى نرى اشرف يقذف بالصغير في البئر ليصرخ وتصرخ زهرة
- قطع

٩١- غرفة عمر / ليل داخلي

- زهرة على السرير تفتح عينها فجأة متسارعة الانفاس ترتعش تبلل شفاهها بلسانها ..
- تستوعب انه حلم فتتمتم بالاذكار ..
- لحظات ويؤذن الفجر فتنشاهد وهي تتنفس الصعداء ..
- اظلام

٩٢ - غرفة عمر / نهار داخلي

- في الخلفية صوت ضعيف لقرآن بصوت البهتيمي قادم من الخارج
- زهرة تفتح عينيها بوهن لتستشعر حركة جوار الشباك لتكتشف انها بداره توارب الشيش وترخي الستاره بعض الشئ عليه حتى تنتبه لاستيقاظ زهرة ..

بداره : .. صباح الخير .. خبطت كثير ع الباب لحد اما قلقت ..

زهرة : (تعندل من نومتها)

بداره : .. ونمتي ازاي طول الليل والشباك مفتوح كده .. ده الليله اللي فانت كانت تلج ..

زهرة : .. م التعب محستش بحاجه ..

- فتهم بسؤالها عن شئ فتراجع بينما نسمع صوت عمر يذكرها ..

ص عمر : .. وبطلتي شغل المخبرين بتاعك ده .. متكلميهاش في حاجه الا اذا هي حكنت ..

بداره : (بابنسامه مفتعله) .. تشربي شاي بحليب ..؟

- قطع

٩٣ - محكمة اسكندرية / نهار خارجي

- عمر خارجا من باب المحكمة بصحبة شابه نحيفه بحجاب بيدها حقيبة عمل واوراق ..

عمر : (مسترسلا) وخليه يطلع ع القسم يعمل له محضر ..

الشابه : .. ماشي ولو اني مش مقتنعه ..

عمر : .. وانتي مين بقى عشان قناعتك تحضر ولا تغيب ..؟

الشابه : .. بجود يا ريس ..

عمر : .. انتي هتعمليلي فيها مفيده عبدالرحمن يختي .. ورحمة ابويا يالميرة تكوني عملاها تاني

لاكون مرجعك المنشيه تبيعي طرح وشرابات .. امشي ..

- فتنطلق منصرفه بينما يخرج هاتفه يتصل بزهره ..

- قطع

٩٤ - شقة عمر / البلكونه / نهار داخلي

- بداره وزهرة جالستان في البلكونه يحتسبان الشاي بحليب حتى يرن الهاتف بجانب زهرة فيتبادلان النظرات حتى ترد بانحراج ..

زهرة : .. الو ..

عمر : .. صباح الفل ..

زهرة : .. صباح الخير ..

بداره : (بنظره متفحصه وهي ترتشف من كوبها)

عمر : .. نمتي كويس ..؟

زهرة : .. يعني ..

عمر : .. بداره اتهورت ولا حاجه ..؟

زهرة : .. لا لا خالص .. حد رد عليك ..؟

عمر : .. ولا حتى فيه اخبار ..

زهرة : (بقلق مستتر)

عمر : .. متقلقيش .. على اخر النهار تكون الاخبار وصلتتنا .. عايزك بس ريلاكس خالص كده

وتتصرفي كانك في البيت .. وانا موصي بداره .. ولو حصل اي حاجه كلميني ..

بداره : (بنظرة متفحصه)

زهرة : (تومئ نعم بهدوء) .. تمام .. مع السلامة ..

- وتعلق الخط وقبل ان تأخذ رشفه من كوبها تباغتها بداره بالسؤال ..

بداره : .. هو انتي تعرفي عمر منين ..؟

زهرة : (لحظات تفكير سريعه) .. من مكتب الاستاذ فخري ..

بداره : (باستيعاب مفتعل) الاستاذ فخري .. هو فخري ليه مكتب في المنيا ..؟

زهرة : .. لا حد كان قالي عليه ..

بداره : .. حد قالك على مكتب محامي في اسكندرية وانتوا في الصعيد ..؟ .. هو....

- لياغتها صوت عمر مجددا يوصيها ..

ص عمر : .. ياستي بس بقى ..

- فتننتبه وهي تبتسم نفس الابتسامه الصفراء وتحتسي من كوبها ..

- قطع

٩٥ - شقة عمر / المطبخ / نهار داخلي

- بداره تحضر طعام الغداء بينما تتحدث في سماعة الموبايل الذي تضعه في جيب ملابسها
بينما نسمع صوت امنية من الجهة الاخرى ..

بداره : .. يختي والبت اجيبها يمين شمال اني اشكلها في الكلام وتقع ابداء ..

امنية : .. يااما اهمدي بقى الوليه شكلها بنت ناس وعزيز قوم ذل .. ياستي اعتبريها حد نعرفه
وجاي يقعد معانا يومين ..

بداره : .. انا اصلا حاسه اني اتخايلت بيها قبل كده ..

امنية : .. شفتي بقى دخلت قلبك ازاي .. المهم بصي انا رايحه مع فؤاد الورشة بعد الشغل نخنار
دهان الخشب ..

بداره : .. اللي هو الساعة كام ..؟

امنية : .. معرفش وقت ماخلص ..

بداره : .. طب كلميني اما تخلصي ..

امنية : .. ياستي هخلص مشاويري وعلى عشرة حداثر هابقي في البيت ..

بداره : .. ماتباتي عندك احسن ..

امنية : .. لأ هو انا كنت بكتب الكتاب عشان الخنقه دي ..

بداره : .. لا كنا بنكتب الكتاب عشان الصرمحه تبقى على ودنه ..

امنية : (بضيق) طب خلاص خليها عشرة ..

بداره : .. احنا بنفاصل على عربية طماطم يابت .. تمانيه بالكثير تكوني هنا ..

امنية : .. طب تسعه واجيبلك رز بلبن من عليك ..

بداره : .. عشرة وزودي المكسرات ..

- قطع

٩٦ - شقة عمر / البلكونة / نهار داخلي

- زهرة تستند بذراعيها على السور ورأسها على ذراعيها شارده بينما والهواء يداعب شعرها
- ..
- تصدر موسيقى اغنية لعمر و دياب من الشاطئ .. تببتسم وهي تتذكر شيئا ..
- دمج

٩٧ - فلاش باك / غرفة عمر ابن زهرة / ليل داخلي

- على نفس اغنية عمرو دياب نرى عمر العشريني امام دائرة مضيئة مثبت بها هاتف يسجل من خلاله مقطع تيك توك ..
- زهرة تفتح الباب بهدوء تتابعه بابتسامه واسعه فيراها فيأخذها من يدها ويرقص معها ..
- لحظات قبل ان يجلسان لتبتسم في وجهه ..

زهرة : .. بقيت نسخه من هشام ..

عمر : (مبتسما) .. الله يرحمه .. ماتيجي نبقي نروح نزوره صحيح .. انا عمري مارحت له قبل كده ..

زهرة : .. مش حباك تعرف سكة الترب الا وانت رايح توصلني ..

عمر : (بخوف) بعد الشر عليك ان شالله انـ...

زهرة : (تسد فمه بكفها) بس .. ده يبقى اخر يوم في عمري ..

عمر : (مبتسما يقبل يدها)

زهرة : .. ربنا يطول في عمرك يا حبيبي وتعيش وتتهنى وتبقي السند والظهر .. واشوفك
اعظم راجل واحلى عريس .. وتملى عليا الدنيا ولاد من ريحتك .. اعيش بس عشان اسعدهم ..

عمر : (بحنان وهو يقبل رأسها ويضمها في صدره)

- دمج

٩٨ - شقة عمر / البلكونة / نهار داخلي

- زهرة تمسح دموعها بينما يرن الهاتف بجانبها فتزد لتسمع صوت عمر ..

زهرة : (بوهن) .. ايوه يا عمر ..

عمر : .. انا هقفل واتصل تاني ..

زهرة : .. ليه ..؟

عمر : .. معقول اسمي بالحلاوة دي ..؟

زهرة : (تصمت)

عمر : .. انا .. كنت بتصل عشان اقولك حاجه ..

زهرة : .. صاحبك كلمك ..؟

عمر : .. لأ ..

زهرة : .. امال فيه ايه ..؟

عمر : .. تو عديني متز عيش ..؟

زهرة : .. فيه ايه يا عمر انا اعصابي مش مستحمله ..

عمر : (لحظه) .. تصوري انك وحشتيني ..

زهرة : (تصمت باقتضاب) ..

عمر : (مبررا) .. انا ..

زهرة : .. انا هقفل يا عمر عشان محتاجه ارتاح شويه .. سلام ..

- وتغلق الخط برأس مشغول ووجه منفرج نوعا شاردة حتى تفاجأ بشئ تحت قدمها لتجده قط
شيرازي ينظر لها فتبتسم له ..
- قطع

٩٩ - شقة عمر / المطبخ / نهار داخلي

- في الخلفية صوت اغنية سحب رمشه صادر من راديو في المطبخ ..
- بداره منشغله في عملها حتى تدخل عليها زهرة حامله القط ..

بداره : .. حمدالله ع السلامة ياخويا انت ظهرت .. تعالى ..

- فتنزله زهرة وتضع له بداره طعاما ..

بداره : .. شوية كبده خساره في امك ..

زهرة : (لحظه) .. تحبي اساعدك في حاجه ..؟

بداره : .. لا انا قربت اخلص .. (وتجلس تكمل لف ورق العنب) .. اتفضلي ..

زهرة : (تجلس بهدوء) .. انا بعتر لو كنت سببتلكوا اي ازعاج ..

بداره : .. اوعي تكوني انتي اللي اتدايقتي من اسئلتي الكثير ..

زهرة : .. بالعكس حقك .. انا لو مكانك مش عارفه كنت هتصرف ازاي ..

بداره : (تتنفحها) .. بس انا اسمع ان الصعيد كلها يعني عيله واحده .. معقول مفيش جدع في

العيله دي يقف لجوزك ده ..؟

زهرة : .. فيه اشكال كده ميقدرش عليها الا ربنا ..

بداره : .. اه والله عندك حق .. الواحد مش عارف الرجاله جرالها ايه .. بقى اسهل ما عليها الغدر

واكل الحقوق .. لا بقوا بيراعوا دين ولا اصول .. (بترحم) فين ايام الرجاله اللي كانت بتبقى شايله

الطين ومكمله عشان خاطر العشرة والعيال ..

زهرة : .. الدنيا بتتغير .. وبتغير معاها كل حاجه ..

بداره : (تنتبه لاسلوبها) .. انتي خريجة ايه ..؟

زهرة : (بسرعة بديهه) .. تجارة ..

بداره : (بنظره) .. ممم .. حلوه تجارة ..

- حتى يرن تليفون بداره فترد لنجده عمر مقلدا يوسف خوري من جديد ..

ص عمر : (يعني اغنية عيد الميلاد/ حاذي باذي)

بداره : (تقاطععه) والنبي بركة انك فاكر ..

عمر : (مداعبا) بقولك ايه انتي اللي مبتكبريش عشان افتكر عيد ميلادك ..

بداره : .. لا وانت معذور (نظره خاطفه لزهرة) هتفتكر ايه ولا ايه ..

عمر : .. عماد كلمك ؟..

بداره : (بتهكم) اه صحيح ده فيه مناسبة عشان يكلمني ..

عمر : .. اهدي بقى الراجل مفحوت في الشغل الجديد .. اكيد هيكلموكي بالليل .. ها .. اجيبلك ايه

السنة دي ..؟

بداره : (بنظره اخرى لزهرة) تاني ..؟ .. ما كفاية هدية امبارح ..

- قطع

١٠٠ - فلاش باك / طريق سفر / ليل خارجي

- هشام يقود سيارته ذات الموديل الوسط
- في الخلفية نسمع اصالة مبحش حد الا انت وهو يدندن معها ..
- لحظات لتظهر سيارة جيب سوداء تتعرض له فينتبه لها وهو يلوح لها وينفوه ببعض السباب
- يتطور الموقف ليقلبوا سيارته على الطريق في مشهد مأساوي ..
- اظلام

١٠١ - شقة عمر / الصالة / نهار داخلي

- زهرة جالسه امام التلفاز شارده
- الشاشة تعرض قناة ماسبيرو زمان / فقرة للمنولوجيست عصام فريد يقلد فهد بلان ..
- لحظات وتخرج بداره بصينية بها كوبيين من مشروب وتجلس ..
- بداره : .. عملتلك معايا كف مريم .. ولا تحبي تشربي حاجه تانيه ..؟
- زهرة : .. لا تمام تسلم ايدك ..
- بينما نسمع صوت عمر في الخلفية وكأنه صادر من راس بداره ..
- صوت عمر : .. وبطلتي جو مشروبات الطاقة بتاعتك دي اللي بترخي بيها اعصابنا وتسرسبينا في الكلام ..
- تشعل بداره سيجارة وتقدم لزهرة فتتردد قبل ان تأخذها فتتابعها وهي تشعلها لها ..

زهرة : .. اول مرة اسمع عن كف مريم ده ..

بداره : : .. يقولوا مفيد لهرمونات الست .. انا اصلي متابعه الوصفات دي وايه اللي بيصغر وايه اللي بيشد تقوليش هتجوز ثاني ..

زهرة : .. ليه لأ ..؟

بداره : (بينما تؤشر لصورة قديمة على الحائط لرجل /والد عمر) واعمل في حبه ايه ..؟

زهرة : .. ده بابا عماد ولا عمر ..؟

بداره : (بتعجب) انتي وصلت لبابا عماد ..؟ .. لا يا حبيبتي ده بابا عمر وامنية .. بابا عماد ده حد ثاني الله يحرقه (بتهكم) عرفتي حكايته ولا احكيها لك ..؟

زهرة : (بابتسامه هادئه) .. لو تحبي ..

بداره : .. انا لا بحب ولا بكره .. انا بقرف .. كل ما افنكر ان اول بختي كان مع واحد زي ده .. طفاني وكرهني في نفسي وعقدني م الرجاله .. زي اسكندرية .. عاشت طول عمرها في حضن البحر .. وهي متعرفش ان هو اللي هيقضي عليها في يوم م الايام ..

زهرة : (تتدبر)

بداره : .. لكن سبحان الكريم جابر القلوب .. (بانسراح) اللي كتبلي الاقي العوض في سيد الرجاله ..

زهرة : (بانسراح)

بداره : .. كان جارنا في الشارع ودكتور في مستشفى المجانيين ..

زهرة : (تبتسم)

بداره : .. في مرة كنت مع امي عندهم وجر شكلي بكلمتين .. اتاربه بيحب اللي في دماغه بصنعة لطافه

زهرة : (تتابع)

بداره : .. زيارتين في ثلاثه في كلمتين في اربعه على كام مقابله وكنت انا اللي واقعه فيه ..

زهرة : (تتابع)

بداره : .. مكنش حسين فهمي ولا حاجه بالعكس .. لكن خطف قلبي بلسانه الحلو ومخه الكبير ..
عيشني العمر كله في اتناشر سنة وسابنا ومشني ..

زهرة : .. اطلقتوا ..؟

بداره : .. اللي زيه لا يسيب ولا يتساب .. مات يا حبيبي .. اتقلبت بيه العربية يا قلبي في سكة
مطروح ..

زهرة : (تتابع بتدبر)

بداره : .. قوليلي صحيح بنتك اسمها ايه ..؟

زهرة : (تنتبه) .. مي ..

بداره : .. مي اه ماشاء الله .. (وتناولها الكوب) اكيد قمر زيك .. ماتوريني صورتها ..

زهرة : .. للاسف التليفون فصل ..

بداره : .. اهو ده عيب الموبايلات .. تفصل من هنا والدنيا تقف من هنا ..

زهرة : (تبتسم بمجامله)

بداره : (تحتسي من كوبها وهي تتفحصها) .. منوره ..

- ويتبادلان النظرات

- دمج

١٠٢ - شقة عمر / الصالة / غروب داخلي

- الجميع على طاولة الطعام يتناولون الغداء
- امنية منشغله نوعا بمتابعة التلفاز .. زهرة تمضع طعامها ببطئ .. وتدور النظرات على الطاولة ..
- دمج

١٠٣ - شقة عمر / البلكونة / ليل خارجي

- زهرة تجلس شارده تتابع المنظر امامها ..
- لحظات ويدخل عمر بكوب من الشاي ويقف بالقرب منها .. تأخذه بينما يتبادلان النظرات ..
- تقف الكلمات على لسان عمر مترددا قبل ان تقطع زهرة الصمت ..

زهرة : .. صاحبك لسه متكلمش ؟..

عمر : (بقلة حيله) .. هيوصل اسوان كمان شويه ويطلع على هناك على طول ..

زهرة : (بقلق) .. وتليفوني هيفضل مقفول ؟..

عمر : .. لحد ما يرد علينا ونعرف هنعمل ايه ..

زهرة : (بقلق)

عمر : .. المهم دلوقتي عايزك تبدئي تصدقي انكوا اتخانقتوا عادي ومشيتي وانتي سيباه واقف على

رجليه .. انسي اللي حصل ده خالص ..

زهرة : (تومئ نعم بتدبر)

عمر : (لها) .. واسف تاني لو الكلمة كانت ضايقتك ..

- ويتبادلان النظرات حتى تظهر بداره فجأة بينهما تنادي لاسفل .. يا مجاور ..
- قطع

١٠٤ - شقة عمر / غرفة عمر / ليل داخلي

- زهرة تجلس القرفصاء شارده على السرير ..
- لحظات وتطرق امنية الباب وتدخل بوجه مبتسم ..

امنية : .. يلا يا جميل مستنينك ..

زهرة : .. بجد يا امنية سامحيني مش هقدر .. كفايه انكوا عاملين عيد الميلاد من غير ناس عشاني ..

امنية : .. عشانك ..؟ ده كده فيه هيصه .. بداره مش بتاعة اعياد ميلاد .. ده عمر جايب التورته بس

وعاملها مناسبه عشان انتي موجوده .. (مازحه) بداره بتاخذ حقها ناشف ..

زهرة : .. انا بجد مش عارفه اعتذر لكوا ازاي عن الدربكه اللي عملتها دي ..

امنية : .. ابدأ والله ده انتي منورانا وعامله حس حلو في البيت ..

زهرة : (بابتسامه)

- ويقطع حديثها دخوار بداره وخلفها عمر وكأنه يدفعها ..

بداره : (بابتسامه مفتعله) .. اتفضلي نورينا ..

- قطع

١٠٥ - شقة عمر / الصالة / ليل داخلي

- وقد نام الجميع وهدأت الاجواء نرى عمر ممدًا يدخن امام التلفاز يشاهد فيلم اجنبي بمشهد قبلة
- ينظر لموبايله ثم باتجاه غرفة زهرة ليظهر انها مظلمه من عقب الباب ..
- ينظر للساعة ليجدها قاربت على منتصف الليل ..
- لحظات حتى يرن هاتفه ولا يتمالك نفسه وهو يرد لندجها زهرة ..
- قطع متبادل

زهرة : .. صحبتك ؟..

عمر : .. لا لا انا صاحي ..

زهرة : .. اصلي سمعت صوت التلفزيون قلت لسه منمتش ..

عمر : .. وانتى منمتيش ليه ..؟

زهرة : .. مش عارفه ..

عمر : .. ولا ضميرك بيأنبك ..؟

زهرة : (بابتسامه تغير الموضوع) .. لا هو شكل الاقراص اللي معايا هي اللي بطلت تجيب نتيجة ..

عمر : .. نصيحة من مدمن بطلي الحاجات دي ..

زهرة : .. مبقدرش ..

عمر : .. جربتي تعدي الخرفان ..؟

زهرة : (تبتسم بوهن)

عمر : (لحظه) .. قوليلي صحيح .. علاقتك كانت ايه بجيهان دي ..؟

زهرة : (بسخرية) عشق .. زي اللي بين روسيا وامريكا كده ..

عمر : .. ومجلس الامن كان مع مين ..؟

زهرة : .. قدام المجتمع الدولي معايا .. لكن اللي في القلب في القلب ..

عمر : (يصمت)

زهرة : (وتتذكر) هي مامتك مبتعملش عيد ميلادها صحيح ..؟

عمر : .. بداره اصلها مبتعترفش بأعياد الميلاد .. تقولك يعني ايه احتفل بسنة راحت من عمري ..؟

زهرة : .. الناس بتحتفل بالسنة الجديده ..

عمر : .. تقولك واحتفل بيها ليه وانا لسه مشفتش من وش ابوها خير ولا شر ..

زهرة : .. بداره دي طلعت دماغ ..

عمر : (مبتسما)

زهرة : (لحظه تتذكر) .. تفنكر ممتش ..؟

عمر : .. كان زمانه وصلك حتى لو بلعتي تليفونك مش قفلتيه ..

زهرة : .. امال يعني ايه مفيش اخبار لدلوقتي ..؟ .. ده تليفونه مكنش ببطل رن .. معقول محدش

قلق وشك في حاجه ..؟

عمر : .. واحد زي ده افنكر لازم يترتب لخبر موته قبل ما يتعرف ..

زهرة : .. ولما يتعرف ..؟

عمر : .. انتي متعرفيش حاجه ومشفتيش حاجه .. واللي حصل له حصل بعد مامشيتي ..

زهرة : (بتدبر) .. امال ليه دايمًا بشوفه عايش في اللحم ..؟

عمر : .. عشان ده اللي بتقنعي بيه نفسك وانتي صاحيه .. بس على فكرة بقى .. كونك بتشوفيه

عايش في اللحم ده اكبر دليل على انه مات .. ستي كانت دايمًا تقول كده ..

زهرة : (تبتسم بوهن)

عمر : .. اللي بنشوفه في اللحم بيبقى عكس الحقيقه .. الابيض يعني اسود والليل نهار والميت بيبقى

حي والحي بيبقى ميت ..

زهرة : (تتدبر)

عمر : .. انا اللي شاغلني دلوقتي موضوع ثاني خالص ..

زهرة : .. ايه ..

عمر : (مداعبا بنبره) .. اكيد ضميرك مش بيأنيك ..؟

زهرة : (تبتسم لحظه) .. روح نام .. تصبح على خير ..

عمر : (يصمت)

زهرة : .. الوو .. عمر ..

عمر : .. يلا مش قررتي تقفلي .. افقلي بقى السكة في وشي ..

- لنفاجأ بصوت الرعد ..

زهرة : (منتفضه) ايه ده فيه ايه ..؟

عمر : .. لعنات السماء .. ربنا مش راضي ع اللي بيتعمل فيا ..

- ويخرج للبلكونه لنجدها تمطر بشده فيقف مستمتعا تحت الماء ..

زهرة : .. هي بتمطر فجأة كده ..

- حتى يلحمها وقد وقفت في شباك غرفتها تستمتع هي الاخرى بالمطر ..

عمر : .. زي ما كل حاجه حلوه بتحصل فجأة ..

- ويتبادلان النظرات ..

- دمج

١٠٦ - شقة عمر / غرفة بداره / ليل داخلي

- بداره على سريرها تجلس ممدده تحت غطاءها تدخن شارده
- تنتبه مع صوت الرعد وهي تنظر باتجاه الشباك في قلق ..
- اظلام

١٠٧ - حلم / غرفة عمر / نهار داخلي

- زهرة على السرير تتمغط بوجه منير مبتسم .. تلعب بخصلات شعرها ..
- لحظات وتتحرك نحو الباب .. تفتحه لتفاجئ بأشرف في هيئة الميت يقف امامها مبتسما
- فتصرخ ..
- قطع

١٠٨ - غرفة عمر / نهار داخلي

- بداره تفتح الباب فجأة ..
- بداره : (بفرع) اعوذ بالله م الشيطان الرجيم ..
- قطع

١٠٩ - سيارة عمر / نهار خارجي

- عمر منفعلًا يتحدث في التليفون .. وعلى الجانب الآخر نسمع صوت بدر ..

عمر : .. هو ايه اللي مرحتش يا بدر هو لعب عيال .. مانا قايلك ياخي ان الموضوع مهم ..

بدر : .. هدي خلك عليا بس يا ابن عمي .. قسما بالله مشواري طلع له مشوار هياخرنى بس شويه ..

صدقني كلها سواد الليل والخبر يبقى عندك بكره الصبح ..

عمر : (يزفر)

بدر : .. طب تحب ابعتاك حد.....

عمر : (مقاطعا بفزع) اوعى يا بدر .. محدش يعرف بالحكاية دي غيرك .. وانت نفسك تحرص في

الكلام وانت بتسأل ..

بدر : .. طب مترسيني ع الحوار بدل مانا عامل زي عسكري الشطرنج اللي ملوش لازمه ده ..

عمر : (بتردد) .. بدر .. اللي هقوله لك ده ولا حتى تعيده لنفسك .. اشرف بركات اتقتل ومراته

عندي ..

بدر : (باستيعاب) مين اللي قتل مين عندك ..؟

- قطع

١١٠ - شقة عمر / غرفة بداره / نهار داخلي

- بداره تدخن بتوتر حتى يرن هاتفها فترد بحدده لنجده عمر ..

بداره : .. انت مبردش ع التليفون ليه ..؟

عمر : .. فيه ايه ياماما في الشغل يعني هكون مبردش ليه ..

بداره : .. الهانم اللي هنا دي قاعده لامتى ..؟

عمر : .. فيه ايه بس ايه اللي حصل ..؟

بداره : .. القتل اللي قتلته طلع لها في الحلم وصاحيه تصوت ..

- قطع

١١١ - شقة عمر / غرفة عمر / نهار داخلي + سيارة عمر / نهار خارجي

- زهرة تتحدث في الموبايل مع عمر بانقباضه .. قطع متبادل ..

عمر : .. انا اتخضيت افكرتها عرفت حاجه .. ايه اللي حصل طيب .. انتي فتحتي تليفونك ولا عرفتني اي اخبار ..؟

زهرة : (تومئ لا بتكرار) عايش .. كل حاجه فيا بتقولي انه عايش ..

عمر : (يزفر) .. الله يسامحك يابدر ..

- قطع

١١٢ - شقة عمر / الصلاة / غروب داخلي

- عمر يفتح باب الشقة بمفتاحه ليرى بداره امام التلفاز امامها كوب من الشاي
- تنظر باتجاهه بلامبالاة ثم تعاود تنظر امامها .. يقترب نحوها بابتسامة يقبل رأسها ويجلس بجانبها

عمر : .. الشاي ده يعني اتغديتوا ؟..

بداره : .. لقيت لها مطرح ثاني ؟..

عمر : (بقلة حيله) .. احنا نازلين المكتب لفخري .. لما نرجع يحلها ربنا ..

بداره : .. ترجع لوحدك ..

عمر : .. اما ارجع يحلها ربنا ..

بداره : (بتأكيد) ترجع لوحدك ..

عمر : (باصرار هادئ) .. لا ياماما هترجع معايا ..

- يتبادلان النظرات حتى تنصرف للداخل بغضب وهو يزفر باتجاهها ..
- قطع

١١٣ - سيارة عمر / ليل داخلي

- يقود عمر السيارة على طريق الكورنيش وبجانبه زهرة يداعب الهواء شعرها ..
- الراديو مفتوح ويذيع برنامج حوارى على اذاعة جديده ..

زهرة : .. آمال احنا رايعين فين ..؟

عمر : .. ولا حته .. حسيت بس ان جو البيت مكهرب قلت افصل الدايره شويه ..

- يسود الصمت لحظات قبل ان تتردد زهرة قائله ..

زهرة : .. بس انا مش عايزه ارجع البيت تاني .. من فضلك نشوف حته تانيه ..

عمر : (بسخرية) .. دلوقتي بس فهمت احساس الراجل اللي بيعق بين امه ومراته ..

زهرة : (له)

عمر : (بقلة حيله) .. هنروح فين بس .. وبعدين لعلمك انا لو رجعت البيت من غيرك بداره هي اللي هتنزل تدور عليكى وتجيبيك ..

زهرة : .. مش باين ..

عمر : .. انتوا كان بيحصل بينكوا حاجه بعد ما بنزل ..؟

زهرة : .. بالعكس ..

عمر : .. ياستي خلاص ببقى اعذري قلقها بس ..

زهرة : .. هو صاحبك.....

عمر : (مقاطعا) بقولك ايه بلا صاحبك بلا صاحبك .. انا مش سايب اللي ورايا وسامعلي كلمتين من فخري وبداره ونازل بيكي زي الحبيبه عشان نتكلم في حاجه ..

زهرة : (له)

عمر : .. انا عايزك تعتبري نفسك لسه مولوده وهو اسكندرية اول هوا يخش جسمك .. واستمتعي بيه على قد ما تقدرى ..

- له بتدبر للحظات قبل ان تطمئن لما قال فتستند برأسها للخلف تستقبل النسيمات بنفس عميق

..

- لحظات من استعراض لكورنيش اسكندرية حتى نراه يتوقف جانبا ..

عمر : .. انا هجيب قهوة .. اجيبلك معايا ..؟

زهرة : (بابتسامه تومئ لا)

- فيترجل باتجاه محل صغير على الكورنيش ..

- الخلفية الموسيقية من الراديو على اغنية اطمئن لنجاة ..

- مع الموسيقى تظل زهرة تراقب عمر تحدث نفسها ..

صوت زهرة : .. ايه اللي لسه مستنيكي يا زهرة ..؟ فرحه المرة دي ولا برضه كسرة قلب ..؟ ..

وجع ولا سعادة .. مع راجل زي عمر .. يحبك وتحبيه .. ويعوضك .. حب ..؟ .. والغول ..؟ ..

الغول مات .. وانتي متأكده انك سيباه ميت .. (لحظه) وحتى لو ممتش .. لحد ما تتأكدي الوقت ده

بتاعك (باتجاهه) انتي وعمر .. ويحصل بعديه اللي يحصل .. انا مش هضيع من عمري ولا دقيقة

كمان وانا خايفه من بكره .. اللي ممكن مبقاش موجوده فيه ..

- حتى تبدأ كلمات الاغنية فتتنظر باتجاهه لينظر لها وهو ينفخ في كفيه لتدفنتهما ويغمز لها

فتتسع ابتسامتها ..

- لحظات وياخذ قهوته متحركا باتجاه السيارة ليركب ..

زهرة : .. انت هتشرب قهوة قبل ما تاكل ..؟

عمر : (متفاجأ بسعادة) احنا هناكل ..؟

زهرة : .. امال خروجة اورديحي بقى ولا ايه ..

عمر : (لها مستوعبا) .. ياباشا انت تؤمر .. بقولك ايه .. فيه مطعم حلو قوي في الهيلتون ..

زهرة : .. مابلاش الطيب احسن ..

عمر : (مداعبا) لأ لا مسمحكيش .. احنا صحيح مش من بتوع الجولدن ايجل بس رجاله وينسد ..

زهرة : (تبتسم بحب)

عمر : .. اللي هيمنعنا عنه بس اني مش عايزك تظهري دلوقتي في اماكن عامه ..

- دمج

١١٤ - مطعم / ليل داخلي

- يدخلان مطعم هادي جدا قد لا يوجد به احد غيرهما والجرسون يرحب بهما

- يمران من جانب بيانو صغير تتحسسه زهرة لاشعوريا وهي سائره ..

- المطعم يطل على شرفه عاليه يجلسان بجوارها .. يتبادلان النظرات ..

- دمج

١١٥ - المطعم/ ليل داخلي

- زهرة تتحدث وعمر يستمع لها مدخنا ..

زهرة : .. كان خاطب بنت زي القمر .. كانت بتحبه قوي ومعندهاش مانع تبيع الدنيا كلها عشانه ..

عمر : .. لسه بتكلمك ؟..

زهرة : .. معايا على طول .. (بمداعبه مره) .. اخر مرة شفتها كنت بقنعها تقبل العريس اللي متقدم لها ..

عمر : (لها)

زهرة : (تبتسم بقلة حيله)

عمر : (مبتسما في عينها)

زهرة : (بارتباك تغير الموضوع) .. انت ايه صحيح ستيكر الغلباوي اللي ملزوق ع العربية ده ؟ ..

اشمعنى الغلباوي ؟..

عمر : .. مفيش .. حكاية كده كنت قريتها حسيت انها انا قوي .. بيقولك ياستي الغلباوي ده يعني بتاع الغلابه .. زمان قبل كليات الحقوق كان بيبقى فيه اكشاك قدام المحاكم بيقد فيها واحد مُقنع ورغاي ويحب يدافع عن المظلومين .. حافظ له كام مادة في القانون بيخش يناطح بيهم قدام القاضي .. وعشان كان ممل زيي كده كان القاضي يدي للمتهم براءة ويحبسه ..

زهرة : (له بابتسامه حب)

عمر : (في وجهها) .. والدفع بعد البراءة .. (ويتبادلان النظرات)

زهرة : (تنتبه بهدوء) .. انا هروح الحمام ..

عمر : (لها مداعبا بهدوء) .. خلي بالك من نفسك ..

زهرة : (تبتسم منصرفه)

- ولحظات باتجاهها قبل ان يتصل ببدر ..

عمر : .. ايوه يابدر .. (ناظرا في ساعته) طيب تمام .. حرص يابدر والنبي زي ما قلتلك وخلي بالك ..

ماشى يا حبيبي .. سلام ..

- ويغلق الخط ويظل يتعبث في هاتفه ويكتب وينتظر وكأنه يبحث عن شئ ..

عمر : (لنفسه وهو يطفئ السيجارة بغيظ) اي خبر .. اي خبر والنبي ..

- ولحظات اخرى قبل ان نسمع صوت البيانو ..

- البيانو على مرمى بصر عمر .. ليفاجأ ان زهرة هي من تعزف عليه

(مقطوعة a comme amour)

- يستوعب لحظات قبل ان يسير مسحورا باتجاهها ..

- يقف بمواجهتها فتتنظر له بابتسامه هادئه وهي تكمل عزفها ..

- لحظات وهو يتأملها وبعد انتهاءها نسمع الجرسون يصفق لها ..

عمر : (لها بهيام) .. كان ليه حق يتجنن عليكى وانتى بتعزفي ..

- دمج

١١٦ - كورنيش اسكندرية / ليل خارجي

- تقف السيارة في احد المواقع على الكورنيش بينما استند عمر وزهرة على مقدمتها يتحدثان ..
- المكان هادئ وضوء القمر مع اضاءة الشارع الخافته وصوت البحر يصنع جوا رومانسيا ..

زهرة : .. كنت فاكراه ان البيت رغم كل حاجه لسه حاضن عيلة بتحب بعض .. بعد اليوم اللي شدوا فيه مع بعض بفترة اتفاجئت انه رجع يتعامل معاه عادي .. وبيعرض عليه يطلع معاه رحلة استكشاف في تونة الجبل .. الحراس اللي هناك قالوله ان ممر معين فيها ممكن يكون بيوصل لاوضه فيها تماثيل بازلت .. (تتذكر) .. اخر فيديو بعتهولي كان وهو على باب المقبرة .. (بحزن ترتجف) كأنه كان بيصور لي نفسه وعارف اني مش هشوفه تاني .. (وتبكي)

- فيحاول عمر تهدئتها وعندما يستشعر برودة يديها يتوجه لصندوق السيارة يخرج منه الشال الصوف الذي دثرها به في القطر ويضعه على كنفها باحكام وكأنه يود لو يحتضنها ..
- فتنتبه بخجل وهي تمسح دموعها وتبتسم وهي تلاحظ الشال ..

عمر : .. في العربية من يومها .. عشان كل ما توحشيني احضنه واشم ريحتك فيه ..

زهرة : (في عينه بينما تغير الموضوع) .. هو كريم في سنة كام صحيح ..؟

عمر : (لها ثم متجاوبا) .. رابعه ..

زهرة : .. مش عارفه قدرت ازاي انه يكبر ويتربى بعيد عنك متشوفوش الا في المواسم ..؟

عمر : .. عكست الوضع .. اعتبرت ان هم اللي هنا وانا اللي ظروف شغلي بتخليني مسافر على طول .. وبعدين وجوده معاه احسن .. ده غير ان كان جت لها فرصة شغل كويسه بره وكان استحاله تسيبه .. انا تعبتها في الجواز .. مكنتش عايز ابقى رزل كمان بعد الطلاق ..

زهرة : (له)

عمر : (في عينها) .. حبتيني ولا لسه ..؟

زهرة : (فتبتسم بانحراج)

عمر : .. اتجوزتية ليه يا زهرة ..؟

زهرة : (له)

عمر : .. كان ممكن تفضلي رافضه ..

زهرة : (بتدبر لحظه وكأنما تفكر) .. القطورات نوعين .. نوع ممكن تفوته ويعدي من قدامك عادي

.. ونوع لو فكرت تفوته هو اللي يعدي عليك .. فقررت اركب .. ولما تعبت وحببت انزل .. لقيت

ببيانه مصفحه ومقفوله بكود .. رقمه تاريخ ما مات ..

- ويتبادلان النظرات للحظات قبل ان تمطر السماء
- ينظران لاعلى ثم لبعضهما بيتسمان مستمتعان بالمطر
- ولحظات قبل ان ترعد فينتفضان بضحكات عاليه وهما يسرعان لركوب السيارة ..
- وداخل السيارة يظلان يضحكان حتى يسود الهدوء بعد اغلاق الابواب
- يتبادلان النظرات قبل ان يتجرأ عمر ويعترف لها ..

عمر : .. بحبك يا زهرة ..

- فيتلون وجهها وهي تنظر في عينيه بانفاس تكاد تفجر صدرها ..
- لحظات بينما تتدثر في مكانها بوجه صامت تنظر امامها بينما يرمقها بنظرة استفهام قبل ان يشغل السيارة ويتحرك بها ..
- دمج

١١٧ - سيارة عمر المتحركة / ليل خارجي

- الصمت يسود المشهد الا من اصوات المطر بالخارج مع صوت الرعد ..
- عمر يقود متديرا ينظر امامه وزهرة شارده بجانبها من الشباك وتختلس النظر باتجاهه بطرف عينها من وقت لآخر ..
- لحظات طويله نوعا قبل ان يرن هاتف عمر بجانبه ليرى من المتصل ويغلق الصوت ويضعه مكانه .. لحظات ليرن مجددا فيغلق الهاتف نهائيا بحنق ويقذف به على التابلوه وهي تلاحظه ..
- دمج

١١٨ - اسانسير العمارة + شقة عمر / ليل داخلي

- يدخلان الاسانسير مبتلين نوعا .. عمر بوجه متجههم يطاردها بنظراته التي تتهرب منها بصمود وهي تعدل هندامها المبلل ..
- يصلان لباب الشقة يفتح ليجدها مظلمه نوعا ..
- ينادي على بداره وامنية فلا احد يجيب ..
- تدخل زهرة الحمام بينما عمر يتصل بوالدته التي نسمع صوتها ..

عمر : .. ايوه يا ماما ..

بداره : (بانزعاج) انا عايزه افهم ايه حدوتة التليفونات المقفوله دي ..

عمر : (مقاطعا بنبرة) ياسستي فصل شحن فصل شحن .. انتوا فين ..؟

بداره : .. خالتك تعبت ونقلناها المستشفى ..

عمر : .. طب انا جايلكوا يلا ..

بداره : .. لا خلاص احنا راجعين اهوه .. انت لوحدك ..؟

عمر : (بضيق) اقلبي يا ماما .. سلام ..

- وبينما تخرج زهرة من الحمام يكون عمر قد اصبح في طريقها للغرفة
- تحاول المرور فيعترضها بهدوء .. يتبادلان النظرات .. يستعطف قلبها بعينيه وتستعطف شهامته بنظراتها فيتركها تمر بقلة حيلة ..
- ترمقه بنظرة اخيرة وتدخل الغرفة وتغلق بالمفتاح .. فلا يسعه الا ان يضرب الحائط بقبضته غيظا
- وخلف الباب نراها تغمض عيناها متألمه تكتم انفاسها حتى تنتبه لقميص له معلق بجانبها فتقترب منه وتدفن نفسها في احضانه ..
- قطع

١١٩ - شقة عمر / الصالة / ليل داخلي

- عمر امام التلفاز يدخن بوجه عابس وهو يشاهد لقطة رومانسية من فيلم اجنبي وينظر باتجاه غرفة زهرة ..
- لحظات ونفاجأ بباب الشقة يفتح فجأة لتدخل بداره وخلفها امنية ..
- عمر يزفر بضيق بينما تتفحص بداره الاجواء وتنظر باتجاه بابه والاضاءه واضحه من تحته ..

عمر : .. في الاوضه وماشييه بكره اهمدي بقى ..

- قطع

١٢٠ - شقة عمر / الصالة + البلكونه / ليل داخلي

- عمر في البلكونه يستمع لاغنية حس اللي بيا لمصطفى قمر من التليفون امامه
- بداره وامنية في الصالة .. بداره تصنع القهوة من السبرتايه وامنية تتحدث في التليفون ..
- بداره تتابع النظر بين التلفاز وعمر ..
- لحظات وتدخل عليه بكوب القهوة تضعه وتجلس تحاصره بنظراتها ..

عمر : .. لزمكي البلكونه .. اقوم ..؟

بداره : (تقوم)

عمر : .. ماما ..

بداره : (له)

عمر : (مقبلا يدها) تسلم ايدك ع القهوة .. بس معلىش عايز اقعد لوحدي ..

بداره : (لحظه له وتنصرف)

- لحظات يشرد فيها مع الاجواء حتى تتصل زهرة .. تتلون ملامحه ثم يرد متحفذا ..
- قطع متبادل ..

عمر : .. ايوه ..

زهرة : (بعتاب) .. احنا متخاصمين ولا ايه ..؟

عمر : (يزفر بقوة)

زهرة : .. طب تصبح على خير ..

عمر : .. اياكي تفقلي السكة ..

زهرة : (تبتسم بمكر)

عمر : .. وبطلني استعباط ..

زهرة : .. ولد ..

عمر : (متفاجأ) ولد ..؟! .. والمصحف اخشاك دلوقتي اخلص منك القديم والجديد ..

زهرة : (بابتسامه واسعه) مجنون وتعملها ..

عمر : .. قصدك خروف ومعرفتش اعلمها ..

زهرة : .. لو كنت عملت غير كده مكنتش هتبقى عمر ..

عمر : .. بس كنت هفضل راجل قدام نفسي ..

زهرة : .. انت سيد الرجالة من غير ما تتهور ..

عمر : .. اه قوي .. حبيبتي قدامي ولوحدنا واسيبيها تعدي وتقل الباب وراها .. بهيم رسمي ..

- تنتبه بداره من الداخل ..

بداره : .. بتكلم مين يا عمر ..؟

عمر : .. الحاج جعبري ياما تاجر البهايم ..

بداره : (تصر عينها باستفهام)

زهرة : (تكنم ضحكتها) متضحكنيش لصوتي يطلع بره ..

عمر : (متهكما) ليه انتي بتعرفي تضحكي زينا بعد الشر ..؟

زهرة : .. يا دمك ..

عمر : (مبتسما)

زهرة : .. تعرف ان عمري ما عملت الجنان ده حتى وانا بنت ..

عمر : .. تفتكري ليه بقى ياست العاقلين ..؟

زهرة : (تتنهد من قلبها) .. يمكن عشان بحبك ..

- مصعوقا يضرب وجهه ورأسه والطاولة بكفه ويتعبث بالولاعة ثم يقذفها من اعلى بحركة مضحكة

- تنتبه له بداره مرة اخرى

بداره : .. فيه ايه ياابني ايه التخييط ده ..؟

عمر : .. مفيش ياما خليكى في حالك .. (ويوارب باب البلكونه)

- امنية تنتبه وهي تتحدث في الموبايل وتؤشر لبداره بحركاتها الصامته ان عمر يتحدث مع زهرة مشيره لها باتجاه غرفتها فتغير ملامح بداره ..

عمر : .. كان لازم يعني اتشال واتحط قدامك وكنت هجيب الحيطه نصين عشان تنطقي .. ياشيخه..

ياشيخه ارميلك نفسى من هنا واخلص ..

زهرة : .. هتلاقيني وراك ..

عمر : .. بحبك .. بحبك ...

- ويظل يكررها بنشوه وهو يقبل الهاتف ليفاجأ ببداره تدخل عليه متعجبه مما يفعل ..

عمر : (متداركا الموقف) .. اصله وقع مني فكنت بصالحه ..

بداره : (بنظرة) .. طب تعالى اقعد معنا ..

عمر : (متصنعا التعب) لا مين .. ده انا حاسس اني داىخ وعايز انام ..

بداره : .. داىخ ليه حامل ..؟

عمر : .. حامل ..؟! .. ليه كده يابداره ده انا بحبك ..

بداره : (بنظره شك للهاتف)

عمر : (مقبلا خدها بصوت) تصبجي على خير .. معلىش انا هبرشط في اوضتك لحد ما تخشي تنامي ..

- ويخرج للصالة مارا بجانب امنية يداعبها هي ومحدثها في التليفون ..

عمر : .. قومي ذاكري قومي ذاكري الماجستير بيروح في داهيه .. اقل يا فؤاد لا وقت للحب ..

- قطع

١٢١ - شقة عمر / غرفة بداره / ليل داخلي

- يدخل عمر متسللا بهدوء ويغلق الباب خلفه ويتمدد على السرير في اضاءة الغرفة الخافته..

عمر : (لزهره التي مازالت على الخط) .. كنا بنقول ايه ..؟

زهرة : .. ان الحامل لازم تنام .. (ويضحكان)

عمر : .. بحبك يا احلى حاجه حصلت في حياتي ..

زهرة : (بهيام) .. عمر ..

عمر : .. ايه ياروحي ..

زهرة : .. ولا حاجه .. بظمن بس لما بقول عمر ..

عمر : .. عمر صلاح ولا عمر هشام ..؟

زهرة : .. وانا بقولها بتبقوا انتوا الاتنين قدامي ..

- مبتسما براحة من كلامها حتى يفتح الباب بهدوء وتدخل بداره

- ينتبه عمر لوجهها المتجهم فيغلق الخط مع زهرة ..

عمر : (معتدلا) طب معلش خمسه وهكلمك تاني .. سلام ..

بداره : (لحظات) .. اسمع .. انا مش على اخر الزمن هيجي عيل زيك يقرطسني ..

عمر : (مستفهما بتجهم) .. عيل زيي ..؟

بداره : (بنبره) مين المرا اللي جوه دي ياواد وتعرفها منين ..؟

عمر : (لحظات) .. متشغليش بالك .. احنا ماشيين بكره ولا بعده بالكثير ..

بداره : (بعده) انتوا مين ياولا اللي ماشين .. دخلك بيها ايه دي عشان تمشي في سكتها ..؟

اسمع.. وديني وما اعبد البت اللي جوه دي لو مطلعتش تكرشها حالا هطلب لها البوليس ..

عمر : .. وماله .. اطلبيلها البوليس .. (بانفعال) عشان ورحمة ابويا متشوفي وشي تاني ..

بداره : (لحظه في عينيه وبفزع) .. مين دي يا ولا ..؟

- ليخرج من الغرفة مغلقا الباب خلفه بشده ..

- قطع

١٢٢ - شقة عمر / الصالة + البلكونة / ليل داخلي

- يخرج عمر للصالة لتقابله امنية ..

امنية : (بخضه) فيه ايه ..؟

عمر : (غير مكترث) اوعي من وشي انتي كمان ..

- تتحرك باتجاه غرفة بداره بينما يدخل هو البلكونه ..

- يتناول سيجارة في فمه من العلبة حتى يكتشف غياب الولاة فيقذف بالسيجارة بعصبيه بينما

يعاود الاتصال بزهره .. لنسمع صوتها فقط ..

زهره : .. ايه اللي حصل فيه ايه ..؟

عمر : .. مفيش حاجه ..

زهره : .. ايه اللي حصل يا عمر ..؟

عمر : .. يا حبيبيتي مفيش حاجه والله ..

زهره : (لحظه) .. طب عشان خاطري متسبهاش تنام زعلانه .. هي عندها حق ..

عمر : .. عندها حق في ايه ..

زهره : .. عندها حق في اي حاجه .. ارجوك متسبهاش تنام زعلانه ..

عمر : .. ماشي ..

زهره : (لحظه) .. تصبح على خير ..

عمر : .. انتي هتنامي ..؟

زهره : .. كفاية كده النهارده .. تصبح على خير ..

عمر : (يزفر) .. ماشي .. وانتي من اهله .. (ويغلق الخط) ..

- وبينما يتناول سيجارة اخرى ويتأهب للخروج من البلكونة يرن هاتفه مجددا ..
- ينظر في الشاشة فتتجمد ملامحه بينما يبلع ريقه وهو يردد ..

عمر : .. ايوه يا بدر ..

- دمج

١٢٣ - شقة عمر / الصالة + غرفة بداره + غرفة زهرة / ليل داخلي

- قطع متوازي
- الجميع في اضاءة خافته
- بداره في غرفتها ممدده تدخن شارده بوجه حزين متوجس ..
- عمر ممددا على الاريكه في الصالة يدخن شاردا بقلق ..
- زهرة في وضع النوم تتدثر في غطاءها بينما تضم اليها قميص عمر براحه وكأنها تختبئ في حضنه ..
- اظلام

١٢٤ - شقة عمر / الصالة / نهار داخلي

- اشعة الشمس تسقط على وجه عمر النائم ..
- يرفع الغطاء ويعتدل جالسا بينما يسعل وهو ينظر للساعة ..
- يمسك موبايله ويتصل بأحدهم ..

عمر : .. الو .. ايوه يارفعت .. بقولك .. عندي مشوار مهم بس النهارده مش هقدر اجي .. لو الرئيس سأل قوله نزلت مصر اشوف اللي حصل في قضية مصنع شبرا .. ماشي .. سلام ..

- ينظر باتجاه غرفة بداره ثم يقوم سائرا باتجاهها .. يلقي نظره داخل المطبخ في طريقه ..
- يطرق باب الغرفة ثم يفتح فلا يجدها .. يتوجه لغرفة امنية يطرقها ويفتح ليجدها ممدده تقلب في هاتفها ..

عمر : .. صباح الخير .. امال امك فين ..؟

امنية : .. نزلت لخالتيك من بدري ..

عمر : (متديرا)

امنية : .. هو ايه اللي حصل امبارح ..؟

عمر : .. انتي مش نازله الشغل ..؟

امنية : (توشر باتجاه غرفة زهرة) ازاي يعني ..

عمر : .. طب اعمليلي قهوة .. واضبطي الوش ..

- ويخرج للصالة مجددا يجلس بينما يتصل بأحدهم فلا يرد فيعاود الاتصال برقم خالته ..
- لنسمع صوتها ..

عمر : .. ايوه ياخالنو .. اه ياحببتي ازيك عامله ايه .. الف سلامة عليكي .. سامحيني معلش
مكلمتكيش امبارح اتسحلت والله في حوار كده لحد مانمت ..

ص الخاله : .. الله يعينك ياحببي لا مانا عارفه ..

عمر : .. امال بداره مبردش ليه ..؟

ص الخاله : .. يمكن تليفونها فاصل ولا حاجه ..

عمر : .. فاصل وهو بيرن عندي؟ .. اديهالي ..

ص الخاله : .. طب معلش سيبها دلوقتي وانا لما تروق هخليها تكلمك ..

عمر : .. ماشي .. قوليلها بس متر غيش كتير .. واهوالاسبكر مفتوح وسمعاني ..

- قطع

١٢٥ - شقة عمر / غرفة زهرة / نهار داخلي

- يُطرق باب الغرفة ..
- تنتبه زهرة وهي تفتح عينيها بهدوء وتتقلب على السرير تتممط بدلال بوجه منشرح بينما تعبت بوجهها في قميص عمر ..
- تقوم بخفه وتسير باتجاه الباب وتفتح بهدوء لتجده عمر ..

عمر : .. صباح الفل ..

زهرة : (تتنفس بابتسامه) .. صباح النور .. (تنتبه لوجهه الصامت تتابعه بقلق)

عمر : .. بدر كلمني ..

زهرة : (فتكتم انفاسها بفرع)

- قطع

١٢٦ - سيارة عمر / نهار خارجي

- داخل السيارة المتحركة يتحدث عمر بينما شردت زهرة بقلق فيما يقول ..

عمر : .. محدش عارف اللي حصل بالظبط .. ناس يقولوا عربية الاسعاف جت خدته وهو مغمى عليه من غيبوبة سكر .. هو كان عنده السكر ..؟

زهرة : (تومئ بوهن لا)

عمر : .. يبقى كلام بواب الفيلا اللي جنبكوا صح ..

زهرة : (له)

عمر : .. قال عربية مع كام عربية تانيه جم خدوه سايح في دمه وقاطع النفس ..

- قطع

١٢٧ - منطقة عامود السواري / نهار خارجي

- عند نقطة مرتفعه جلست زهرة تتابع بقلق مايفعله عمر بجانبها حيث بدأ في وضع شريحة هاتفها وهما يتبادلان النظرات من وقت لآخر ..

عمر : .. اكثر حد هتلاقيه مكرمك هو ده اللي هنتصل بيه ..

زهرة : (بايماءات متوجسه)

عمر : .. اهم حاجه تفضلي هاديه .. اتخانقتوا في اسوان خناقة كبيرة مشيتي وقفلتي تليفونك ..

زهرة : (له)

عمر : .. لو مات فانتني مسمعتيش او قرיתי اي حاجه تعرفك ..

زهرة : (برعب) .. ولو ممتش ..؟

عمر : (لحظه) .. مفنكرش كان زمانك معايا للحظه دي ..

- ويتبادلان نظرات لينفرج وجهه فتهدأ ملامحها نوعا وهي تبلع ريقها ..

- يفتح التليفون ..

زهرة : .. اقلل النت ..

عمر : .. اول حاجه عملتها .. (متفحصا الهاتف) مكالمات من ناس كتير .. بس اكثر حد مكرمك

جيهان دي

زهرة : (بنفور)

عمر : (يعطيها الهاتف) .. كلميها ..

زهرة : (بملامح مستنكره) .. اقولها ايه ..؟

عمر : .. سببها هي اللي تقول الاول ..

زهرة : (بتوجس)

عمر : (يطمنها بينما يمسك يدها ويعطيه لها)

زهرة : (تتصل)

عمر : (يضغط على زر مكبر الصوت)

- بعد رنه واحده ترد جيهان لنسمع صوتها .. وعمر يتابع زهرة موحيا لها بالاجابات ..

جيهان : (بحده) الو .. انتي فين يابني ادمه انتي وتليفونك مقفول ليه كل ده ..؟

عمر : (مؤشرا ليه)

زهرة : (بثبات مصطنع) .. فيه ايه ايه اللي حصل ..؟

جيهان : .. اشرف مات ..

- لبعضهما بمشاعر مختلطة ..

جيهان : (منهاره) .. كيفين اتصل بيه كتير ولما مردش راح له الفيلا لقاها يا حبيبي سايح في دمه
(وتبكي)

زهرة : .. انتي بتقولي ايه ..؟ .. مين اللي عمل كده ..؟

جيهان : (بحده) انا عايزه افهم انتي سبتيه ورحتي فين ..؟

عمر : (يؤشر بعراك)

زهرة : .. اتخانقنا يا جيهان .. اتخانقنا ومشيت ..

جيهان : .. اسمعي .. احنا مكتمين ع الخبر لحد ما نلم نفسنا ونعرف مين اللي عمل كده .. الولاد
شاكين في ابو سته بتاع السويس .. انتي فين عشان ابعثلك عربية تجيبك ..

زهرة : (لعمر)

عمر : (مؤشرا بطيارة وغدا)

زهرة : .. انا مش في مصر .. هحجز على اول طياره وانزلكوا .. سلام ..

- وتغلق الخط بهدوء لتغمض عينيها براحة ليضمها اليه فتدفن رأسها في صدره بينما ينظر للسماء يتنفس الصعداء ..
- دمج

١٢٨ - الكورنيش / غروب خارجي

- عند احد النقاط الهادئه على الكورنيش جلس الحبيبان في ضوء الغروب على مقربه من البحر ..

- زهرة تستند برأسها على كتف عمر شارده في البحر .. لحظات ..

زهرة : .. هيوحشني البحر قوي ..

عمر : (مقبلا رأسها) .. لحد ما نخلص الدريكه اللي جايه دي وترجعيله ثاني ..

زهرة : .. ياريت ..

عمر : .. بس في شقة هتبقى بعيده شويه عنه ..

زهرة : .. وشقة بداره مالها ..؟

عمر : (مبتسما)

زهرة : .. بنفس الاوضه ونفس السرير اللي نَفْسُك فيه .. نفس صوت القران اللي كنت بصحى عليه .. وكباية الشاي بلبن اللي بشربها الصبح في البلكونه .. صوت الشارع والناس .. صوتك انت وبقاره وانتوا بتتناقروا على اي حاجه .. وفؤاد وهو جاي ياخذ امنية عشان ينزلوا ينقوا حاجه بيتهم ..

عمر : (يحتضنها مقبلا رأسها)

زهرة : .. وانا داخله المحطة مذعوره بعد اللي حصل .. كانت الدنيا سوده في عنيا .. لدرجة اني فكرت ارمي نفسي تحت القطر مش جواه ..

عمر : (يحكم ضمته لها)

زهرة : .. لحد اما عيني جت عليك .. كنت الحاجه الوحيده المنوره قدامي .. زي ما يكون ربنا كان
بيشاورلي عليك .. وبيقولي خليكي مع ده .. ده قطرك الجاي .. قطر النوم .. اللي مش هتحسي
معاه بطول الرحلة وتعبها .. اللي هتوصلي معاه اخر المشوار وانتي مستمتعه بكل ثانيه فيه ..
.. بحبك يا عمر ..

- دمج

١٢٩ - شقة عمر / الصالة / ليل داخلي

- تجلس بداره تشاهد التلفاز على مشهد من فيلم قديم بينما تحتسي الشاي ..
- لحظات ويدخل عمر وزهرة وفور رؤيتها لهما تترك المكان متوجه لغرفتها ..
- تشعر زهرة بالحرج فيؤثر لها عمر بالذهاب لغرفتها مرسلا لها قبلة في الهواء قبل ان تنصرف ..
- يتوجه عمر لغرفة بداره المغلقه ويطرق الباب وعندما يفتح يجده يغلق في وجهه ثم بالمفتاح..

عمر : .. افتحي ياماما عايز اتكلم معاكي .. ماما .. افتحي لو سمحتي .. مانا مش ماثني لحد ما تفتحي .. (لحظه) طب افتحي طيب اجيب بطانية الجو ببيرد بالليل .. ماما ..

- ليطفى نور الغرفة فيزفر بقلة حيله ..
- قطع

١٣٠ - شقة عمر / الصلاة + غرفة بداره / ليل داخلي

- الاجواء ساكنه الا من صوت قرآن الفجر من مكبرات الصوت بالخارج وتكات ساعة الحائط..
- عمر في وضع النوم ولكنه مستيقظ
- بداره تخرج من الحمام تجفف وضوءها متممه بالاذكار .. تدخل غرفتها وتغلق الباب
- يتابعها عمر وبعد غلق الباب بلحظه يقوم متوجها للغرفة .. يفتح جزء من الباب لتظهر ملامحه امامها وقد ارتدت ملابس الصلاة وافترشت اريكه بالغرفة .. ترمقه بنظره ثم غير مكثرته ..
- يدخل ويجلس ثم يدفن رأسه بطفولية في حجرها مشبك الذراعين وهي تتناول راسه بكل حنان وتملس علي شعره .. ولحظات ..

بداره : .. انت رجعت للهباب ده تاني والبت دي الديلر ؟..

عمر : (ملتفتا لها بتعجب) .. ايه ..؟

- وينفجر ضاحكا بينما يسعل منتفضا فبحنان الام تطبطب عليه .. ويهدأ ..

عمر : .. اللهم اجعله خير ..

بداره : .. يعني مش خير اهوه ..

عمر : (مقبلا يدها) وحياتك عندي خير ..

بداره : (له) .. طب ما تظمني ياابني الله يهديك ..

عمر : .. اطمني .. والله ما بعمل حاجه غلط ..

- بداره : .. محدش بيعمل الغلط وهو عارف انه غلط ولا مكنش عمله .. الغلط بيخشلك زي التعبان .. بحس هادي وتمليسه ناعمه .. ويتسحب لحد اما يتملك منك ومتفوقش الا على لسعته ..

عمر : .. بس زهرة مش تعبان ياماما ... ده هي اللي كانت في جحر التعبان وربنا خلصها منه ..
وبعدين ده انا اللي حطيت نفسي في سكتها ..

بداره : .. طب ع الاقل قولي تطلع مين ..

عمر : .. كلها بكره وارجع احكيلك كل حاجه ..

بداره : (له) .. متفتحش صدرك على مشاكل انت مش قدها ..

عمر : .. سببها على الله ..

بداره : .. بتحبها ..؟

عمر : (متنهدا) اه يام عمر .. (وبمزح مقلدا الاغنية) حبيبتها .. ايوه انا حبيبتها....

بداره : (تلكمه مداعبه) .. كريم جاي امتى ..؟

عمر : .. يعني قدامه بتاع اسبوع كده ..

بداره : (بتهكم) وهتبقى فاضي بقى تفسحه ولا ...؟

عمر : .. لأ ولا طبعا .. هكون ابتديت افرش الشقة .. ولو انها حبت القعد هنا ..

بداره : .. تفرش ايه ومين يقعد فين .. وحياتك امك ما يحصل حاجه قبل ما اعرف اصلها وفصلها
واشوف هواق عليها ولا لأ ..

عمر : .. يعني هي بتحبك الحب ده كله وانتى لسه مزمزقه .. هتبتديها كده مع مرات ابنك ..

بداره : (بتعجب) مرات مين يا ولا .. احيه انت اتجوزتها من ورايا ..؟ (يخفت الصوت)

عمر : .. انا وش ذلك ..

بداره : .. انت ذلك وش يا ابن دكتور المجانين .. انا قلت العرق ده مش هيجيب غير عيال لاسعه ..

عمر : (يضحك) .. خلصي بقى وادعيلنا دعوتين حلوين وروقي عليا بفنجان القهوة بدل كباية البن

الصايصه اللي عملتهاي بنتك الصبح

- دمج

١٣١ - فوتومونتاج لكورنيش اسكندرية / شروق خارجي

- لقطات مختلفة لاجواء اسكندرية الحميمه مع اولى نسمات الصباح
- دمج

١٣٢ - شقة عمر / غرفة زهرة / نهار داخلي

- زهرة وقد ارتدت ملابسها تجلس على طرف السرير تنظر للسماء من شباك الغرفة
- لحظات وتنتقل بنظرها بين تفاصيل الغرفة و عندما تصل للسرير تلمس عليه بشجن وهي تتشبث باصابعها فيه ..
- لحظات ويدق الباب فتفوق فورا وهي تنظر باتجاهه ..
- تفتح لنجده عمر وقد ارتدى ملابسه ايضا ..

عمر : (بانسراح) .. يلا يا حبيبي ..؟

زهرة : (بصمت وكأنها تريد ان تومئ لا)

عمر : (بملامح مطمئنه)

- تخرج معه من الغرفة باتجاه باب الشقة لتقابل امنية لتحتضنها وتسلم عليها ..

امنية : .. هتوحشينا .. خلي بالك من نفسك ..

زهرة : (لحظة صمت) .. انتوا اللي هتوحشوني .. سلميلي على فؤاد .. ربنا يسعدكوا ..

- لنرى بداره تخرج من المطبخ تجفف يدها بوجه صامت ..

بداره : (لعمري) .. ابقى طمني لما توصل .. وترد لما اكلمك .. (ولها) .. توصلوا بالسلامة ..

- بهدوء تمد لها زهرة يدها لتسلم عليها لتلتقي عيناها للحظات فلا تشعر زهرة الا وهي تحتضن بداره بحميميه لتفاجأ الاخرى والتي تنكسر حدة وجهها وهي ترد لها الحزن بامومة بينما تلمس على شعرها .. لحظات ..

بداره : .. بحق العيش والملح تخلي بالك منه ..

زهرة : .. افديه بعمرى ..

بداره : .. تروحووا وترجعوا بالسلامة ..

- تبيض ملامح الجميع بينما عمر يقبل رأس بداره ..

- يفتح الباب وتخرج زهرة اولا بوجه بشوش .. وقبل ان يخرج عمر خلفها تتشبث بداره في ذراعه ..

بداره : (في عينه مؤكده) .. خلي بالك من نفسك ..

عمر : (يطمننها بابتسامه)

- يتحرك ليخرج فتنشبث به مجددا تنظر في وجهه ..

عمر : (مقبلا تلك اليد) .. يلا بقى عشان متأخرش ..

- تظل تتابعه بعينها وكأنها تحفظ ملامحه ..

- يخرج ويغلق الباب فتنفض من صوت غلقه ..

- قطع

١٣٣ - اسانسير العمارة / نهار داخلي

- زهرة تنظر لعمر في قلق فيحتضنها بذراعه مطمئنا وهو يقبل رأسها بينما تنتابه نظرة قلق ..
- دمج

١٣٤ - الطريق الصحراوي / سيارة عمر / نهار خارجي

- عمر يقود بنظرات زائغة امامه وزهرة شارده ثم تنظر له .. ينتبه فيبتسم لها مطمئنا بينما يشغل من هاتفه اغنية بكره يا حبيبي لنسمعها في السيارة ..
- مثبتته نظرها عليه فيمسك يدها يقبلها ويظل ممسكا بها وبشفاهه صامته يقول .. بحبك ..
- دمج

١٣٥ - فيلا زهرة / نهار خارجي

- الفيلا تظهر كامله وكأنها مقبرة كبيره ..
- تدخل سيارة عمر من البوابة الضخمة بينما تنظر لها زهرة برهبة وخوف ..
- تصل السيارة للباب وتقف وينظر لها عمر ..

زهرة : (بتوجس) .. عشان خاطري بلاش تنزل .. هخش انا الاول اشوف ايه اللي بيحصل ..

- وكأنه لا يسمعا مترجلا حتى يصل لبابها يفتحه لتتردد لحظه قبل ان تنزل ..
- تفتح الباب بالمفتاح لتجد جيهان تفتح من الداخل في نفس اللحظة فتنتفض فور رؤيتها ..
- جيهان في ملابس عاديه تتفحص عمر قبل زهرة ..

جيهان : .. حمدالله ع السلامة ..

زهرة : (تجاوب على نظرات جيهان) .. الاستاذ عمر .. المحامي بتاعي ..

جيهان : .. المحامي بتاعك ؟ (تفسح لهم الطريق) .. اتفضلوا ..

- ويدخلان وتغلق خلفهما الباب ويسيروا في البهو ..

زهرة : (الجيهان بتصنع) .. ايه اللي حصل ؟ ..

جيهان : .. هتعرفي كل حاجه .. (وترمق عمر بنظره)

- زهرة تنظر لعمر نظره سريعه يردها لها وكأنه يقول اثبتي ..
- يدخل الجميع غرفة المكتب .. غرفة عريقه باثاث فخم ..
- فور دخولهما نرى رجلين عند المكتب الضخم (ولدي اشرف بركات في سن الثلاثينيات)
- يرمقان زهرة وعمر بنظرات ثاقبه وتتوجه جيهان للوقوف بجانبها ..

- وبينما تتبادل زهرة النظرات مع عمر الذي تحولت نظراته لنظرات متفحصه محلله نفاجاً
بباب الغرفة يغلق ويظهر خلفه حارسين ضخمين ..

- ولحظات حتى يظهر اشرف بكامل هيئته من باب اخر قريب من طاولة المكتب ..

اشرف : .. كان نفسي انزلك م السقف زي موضة الافراح اليومين دول ..

- لتتنفض زهرة فزعه تصرخ وهي تحتمي بعمر الذي ضمها اليه لاشعوريا ..

اشرف : .. بس خفت لتفتكريني ملاك الموت ..

- يرمقهما اشرف بنظرة ثاقبه بينما يتوجه نحوهما في ثبات بخطوات هادئه متجاهلا النظر
لعمر ..

اشرف : .. تصوري كنت مراهن على ذكائك بمليون دولار .. (لاحدى ولديه) تكسب يا جيمي ..
يا خساره متعلمتيش مني حاجه .. (ممسكا شفاهها فتنفضها) معقول يا بيبي تطلعي بالغباء ده وتيجي
برجلك لحد هنا .. ولا جيهان اللي طلعت شاطره وبتعرف تمثّل .. ولا الفلوس اللي افكرتي انك
هتورثيها مني هي اللي جمدت قلبك ؟ .. (وهو يزيح يد عمر عنها باطراف اصابعه) .. ولا
اللامور عماكي وخالكي تفتكري ان اشرف بركات ديته رصاصه ..؟

زهرة : (منتفضه ترتمي بجسدها باتجاه عمر)

جيهان : .. ياما حذرته ان سمك ناعم وقرصتك مش سهله .. وانك هتلبديله زي الحيه لحد اما
تلدغيه .. (ب غل) اقسام بالله لو كان اتخدش بس .. كان زماني انا اللي بدور عليك عشان امزع قلبك
بسناني

اشرف : (يرسل لها قبله مفتعله في الهواء)

- وبحركة سريعة يرفع سلاحه على راس عمر فتصرخ زهرة ..

زهرة : .. لأ ..

اشرف : (ساخرا بينما يخفض سلاحه) .. كنت متأكد انه دكتور النسا مش المحامي .. عموما كيفين
من غيره مش فارقه .. المهم انك غيرتي جو ومزاجك راق ..

عمر : (بامتعاض)

اشرف : (يرفع المسدس لرأسه مجددا ومازال يتحاشى النظر اليه)

زهرة : (تصرخ) ابوس ايدك سييه .. (باستعطاف) .. ابوس ايدك ..

اشرف : (لها متلوكا بلسانه بينما يعطيها المسدس)

زهرة : (للسلاح وله)

اشرف : (صارخا كالرعد) امسكي ..

زهرة : (فتأخذه وهي تنهنه مرتجفه)

اشرف : .. فجري دماغه ..

زهرة : (ترتجف وهي تومئ برأسها لا)

اشرف : .. يا تفجري دماغه يا تونة الجبل هيبقى فيها اتنين يخصوكي ..

زهرة : (له برعب)

اشرف : .. والمرة دي هنتشوفي كل حاجه بعنيكي ..

- ويتركها متوجها للمكتب يجلس بين عزوته في كادر معين ويبدأ العد التنازلي .. ٥ ...

- عمر لايهمه الا زهرة .. يحتضنها بنظراته وهو يومئ لها افعليها ..

- تنفجر دموعها بصمت وهي ترتجف .. تتأمله طويلا وعيناها تنتقل بين ملامحه ثم تطبع على

شفاهه قبله مع كلمة حب اخيرة ..

- يصل العد للرقم واحد ..

- قطع

١٣٦ - فوتومونتاج

- لقطات متقطعه ..
- زهرة المنهاره تصرخ بينما تطلق رصاصه على راس عمر
- بداره امام التلفاز في شقتها تقبض على صدرها في ضيق
- زهرة تطلق الرصاصه على نفسها وعمر يصرخ
- بداره في البلكونه تنتظر في اتجاه معين
- اشرف يطلق من مسدسه طلقات متتاليه باتجاه عمر وزهرة
- بداره في البلكونه جالسه تتصل من تلفونها
- زهرة ملقاه ميته في حضان عمر الذي امسك بالمسدس يصوب طلقات غاضبه باتجاه اشرف
- بداره في البلكونه تضع الهاتف على اذنها
- زهرة في محطة القطار تنتظر باتجاه القطار القادم نحوها مسرعا (كما في مشهد ٤٧)
- عمر خارجا من باب محطة القطار في ضيق يرد على هاتفه (ألو) بينما ينظر خلفه
- بداره في البلكونه بوجه منشرح تقول في التليفون .. ربنا يكفيك شر طريقك ..
- زهرة تهوى بنفسها امام القطار
- قطع

تَمَّتْ

**كم لديك من السطور الجميلة التي أخذت
منك الكثير من الجهود والاعتناء
لكي تكون أفضل ما يمكن لتعبر بها عن شعور
داخلي لم تستطع أن تشاركه مع أحد غيرك.**

**مهما كانت سطورك
قصص... روايات... أشعار... مقالات
باللغة العربية أو الإنجليزية أو الفرنسية**

**تواصل معنا
لتشارك سطورك مع العالم**

٠١١٢٢٣٨٠٤٤٣